

# *MÂYÌ ÀDÌ ÀNUKÙ DÎBÀ DYÔNSÒ*

## *ÀPÀTUKA MU LUBWEBWE*

 Tudi ne kusàkidila mu dìndà emu bwà Bwikadi bwà Mukalenge Nzambi, bùdì bufwànyìne kubanga ntwàdijilu wa masangisha ne kutùpèeshà kwà mukenjì, wà ne-wà ne bidi bítükengela “kutèèleja, kwikala ne kaneemu” kumpàlà Kwèndè, bwà ne Yéyè ùdi ne cintu kampàndà cyà kutwàmbila. Ndi mutwìshiìbwé ne Yéyè neenzé cìdiYe mulayè. Yéyè ùtu misangu yônsò ànu mushàale mukwâte ku Dîyi Dyèndè. Ne pa nànkú tudi ne kusàkidila bwà kwikala badìsangishe, ne mwoyi, elu luseke lwà Cyendèlèèlè mu dìndà emu, ne bakùmbànè mwà kukuukwila cyàkàbìdi Mukalenge, ne kudisangishakù twêtù biine ne kutèèleja maalu à kùdìYe. Ki kabingilà kàtùdi tûdisangishila, mbwà kôkò kiipàcìlà mene aka.

<sup>2</sup> Mpindyewu, ndi mwenen anu bu mupàtukileku Mwanèètù Neville, mûmvwà nciyi mutèkèmène to, leelu ewu, bwà cilootà kampàndà ncîmvwa muloota. Aci... Ntu ngiitabuuja mu... Ntu... mu bilòtà. Ntu ngiitabuuja ne Nzambi ùtu ùkwàta mudimu ne bantu ku bilòòta. Kàdi mvwa mulòòte cilòòtè cyà pabwàci menemene, bufùkù bwà dyàbwàbwà abu. Ne, mvwà ngenda ndònà luseke lwà kakùnà, luseke kampàndà lwà kakùnà, ngenda nya ku mwaba wa didiìla kûmvwà ne cyà kupeta cyàkudyà cyànyì—cyànyì cyà mundaamuñyà. Ki mêmè kumònà ne, pâmvwà ngenda nseemena ku mwaba awu, bàvwa bimba mijikì, cisùmbù kampàndà cyà bimbi cìvwa munkaci mwà kwimba mijikì, ne bïndaalà, ne ciikàle munkaci mwà kucyònkomomoja bantu pàvwàbò bàdyà apu. Kàdi kùvvwa cintu kampàndà mu cyôci amu cîmvwà nciyi munangèku to, pa nànkú mêmè kulekela ànu cintu aci ku luseke. Ki mêmè kutwìlangana ne muntu kampàndà wènda ùbànda kakùna. Ki mêmè kutàngila, nènku bantu bààbûngì bàvwa bënda bàbànda kakùnàaku batàngile ku mwaba wà didiìla awu. Kàdi mêmè kwenza bu mubeepuke, kukùdimuka kwalukila ku dyàbalùme, anyì, ku dyàbakàjì.

<sup>3</sup> Kàdi mu mùshindù kampàndà, mwinshì mu cibandabanda amu, mvwa mwà kumònàmù tabernacle. Mêmè kuumvwa dîyì dyà muntu kampàndà, dyàmba ne: “Ndà ùkatuutàkèènè ne Mwanèètù Branham mu disangu kampàndà. Ùdi wenda utuuluka ku lusongo lwà kakùnà kwàka. Nènku ùmwambile bwali kampàndà.” Ki mêmè kulwijakaja bwà kufika mu dyôdî disangu adi.

<sup>4</sup> Kàdi pààkalwà mwinè muntu awu, ùvwa mmwanèètù Neville muvvwàle nkooci wendè wa mufiìkùlùke awu, ùvwa

ne mmwènekelu ànu udiyè musòmbe nendè mu dìndà emu ewu. Ki kwambayè ne: "Mwanèètù Branham, byôbì ne newìkalè mu cimenga," yéyè ne, "mbifwànyìne kwikalà ci—cintu címpè bwà wéwè kupwekamù, bwalu Mwanèètù Hank..." Mpindyewu, umwèpelè ûndìku mumanyè dyèndè, Mwanèètù Hank, m'Mwanèètù Henry Carlson, tutu tumubìikila ne Hank. Yéyè ne: "Mmufwànyìne kwela meeji ne cìvwa cintu cyà pabwàci bwà ne kwéna mutàmbe kulwa kukùmbula tabernacle bu wéwè mwà kwikalà mu cimenga emu, anyì mu nyùngulukilu wa cimenga ndambù wa matùkù." Mémè kutàbuluka.

<sup>5</sup> Nènku, pa cyòcì aci, mêmè kwenza ànu bu wadyúmvù mu mùshindù wa pabwàwù. Ncìvwa muswè kudibweja mu ndongamu mu cikondo aci cyà lumingu to, too ne pângààluukonka Mwanèètù Neville ní ùvvakù ne cintu cyà pabwàci mu dìndà emu, bwà èkèleeziyà. Pa nànkù kwikalayè ne musàngeelu wàbûngì, mwèndè amu's, kwambayè ne: "Lwâku." Pa nànkù, ki patwàfikì apa. Mvwà mumubìikile ku telephone makèèlèlè awu ku shòò mu mapingaja amu, ne kulwa mu dìndà emu's, kabiyikùbyà ní nganyì wa kutùdì mutèkèmenè to.

<sup>6</sup> Mpindyewu ndi ngeela meeji ne ncifwànyìne kwikalà cintu címpè, dyàmbedi, bwà ngänjiku ànu ku—kunùùmvwija bintu kampànda. Mémè, mbyenzè bu ne, ntu muntu wa pabwèndè bwà bantu bààbûngì. Ne mu mùshindù kampànda, ntu kàbìdì muntu wa pabwèndè bwànyì mêmè mwinè. Bwalu, ndi nteeta kulonda bulombodi bwà Nyumà Mwîmpè, ànu pabwípi ne mwànyì mwônsò. Nènku aci ncìdì cyènza ne twikalè bàà pabwètù, nwamònou's. Tudi twenza bintu mu mùshindù wà—wà tushààla cyà bushùwà basòmbe ne tudikonka míngà misangu ne: "Ndi mwenzè cintu bu nùnku bwà cinyì? Mmunyì mûndiku mwenzè cintu bu nùnku's?" Ne dîbà adi mene udi mwà kudyàmbidila ne udi mwenzè menemene cìvwa kaciyi cìkengelà bwà wéwè kwenza to. Kàdi bu wéwè ànu mwà kwikalà ne lutùùlù, ne kwikalà ne diitabuuja, ne mwikalà mutwìshìibwe ne Nzambi mmukulombòle bwà kucyènza, neùcisangànè ne cìdi cìkùmbanangana mu cyòcì menemene. Nwamònou anyì? Ne misangu yàbûngì tudi tusangana nànkù awu. Ne ndi mumanyè ne Mwanèètù Neville mmusangànè cyòcì aci, misangu yàbûngì. Ne balombodi ne bantu bàà nyumà bâdì bâfika ku dyumvwa aci.

<sup>7</sup> Kùkaadi cikondo kampànda mu nsòmbelu wanyi cyà... Bwà kwamba menemene, kacya ànu pâncìvvà mwânà mutekète, kacya ncìtuku mwanjà kuumvwa bulombodi bwinè bwà ne bivwa binkèngela bwà mêmè kwikalà musòmbèle mu—mu Jeffersonville emu to. Citu misangu yônsò ànu ne katanyì, bwànyì mêmè bwa kuteeta kwikalà musòmbèle mûneemu. Cyà kumpàla, kuulu kùdi kùpangakanangana naanyì byenzè ne bibì be. Cikwàbò cintu, kùdi kùmwèka bu kùdi dibungama dyà nyumà.

<sup>8</sup> Paùdì walukila bwà kutàngila mwab'ewu, piìkalàwù kawùyi mubùtùdiìbwé mu cikondo cyà dipaasalala dyà mâyì to, kùdi mukàndà mumfündila bwà bwalu abu, wûngààkapetâ, pâncìvwà mfuminaku ku dibìikìdìbwá mu mudimu wà bwambi, mêmè kubanga kuumuka. Ki mêmè ne Mwanèètù George DeArk . . .

<sup>9</sup> Ne mamwëndè wa Mwanèètù Graham Snelling, Mwanèètù Hawkins udi ulombola cyujidi cyà kàsòloonyi mu New Albany awu, ne bâàbûngì bâà ku bantu abu, kutwilanganabò naanyì pambèlù pàà kaaba kakesè kàà disangisha dyà milòmbo mwaba ewu. Kwambabò mene ne, bu mêmè mwà kushààla, bâvwa bafwànyine kukèèpesha didyà dyà bânà bâàbò balela ku mèèsà, bwà–bwà kwibakabò tabernacle kampànda, bwà kabikèngedikù bwà kwikalabò bâtànkakajiibwa bàya eku ne eku to.

<sup>10</sup> Pângààkuumvwà maamù mukesè awu, ne mwánà umwèpelè mukwàta ku cyanza ne mukwàbò mwambula mu dibòko, wàmba ne yêyè ùvvwa muswè kukèèpesha didyà dyà bânà bêndè ku mèèsà, bwa kwibaka kaaba kàvwàbò bafwànyìnekù kushààla bwà kwikalala kukuukwila, cyàkampicila mêmè bwà kucitwàla. Pa nànku mêmè ne Mwanèètù George twétù kudìsangisha ne kwangata dipàngadika dyà ne tuvwa mwà kushààla ne kwasa tabernacle.

<sup>11</sup> Nènku pààkiibakiìbwà tabernacle, bìdi misangu yônsò ànu bìmwèka bu . . . Dìndà dîngààkalàmbulà tabernacle ewu, cikèènà-kumònà kulwaci, cìdi cifunda ne citèèka mu dibwe dyà mu ditumba mwàmwà, pààkangambilà Nyumà Mwîmpè ne: "Ewu kî ngwebè tabernacle to." Nwamònu anyì? Ki mêmè kukanaka mwaba wùvvwà wanyì tabernacle usanganyiibwa, ki Yéyè kunsòmbesha mwinshì mwà maulu à bleu. Ki pashìishe Yéyè kwamba ne: "Enzà mudimu wà mutangadiki," ne bikwàbò, munùdì bamanyè amu. Mbifunda mene ne mu mikàndà.

<sup>12</sup> Bintu byônsò abi bisanga pàmwè. Ne dîngà ditùkù pâmvwà munkaci mwà kukosa mashinda mu bulà bwà mwaba udi Mwanèètù Wood musòmbèlè mpindyewu ebu, ne màmwenu ùvvwa musòmbèlemù mwine musangu awu; mêmè kusòmba pa cibàndilu cyà paanyimà, cibàndilu cikesè cyà kale cyà nshààmendà, cîmvwà mwibàkile kaaba kakesè aka bwà màmwenànyi. Ne yêyè ùvvwa bu mulami wa ku èkèleeyiyà aka mwine musangu awu, ùmukùba. Kàdi ànu bitòòke tòò mùdi muntu kanà yônsò ewu mufwànyine kwakula, Dîyì kwakula naanyì, dyàmba ne: "Ncyêna mwà kukubèneshakù to paùcidì ànu mushààle mwaba ewu. Bikèngela ùtapulukè ne bâà kwènù ne mwaba ewu." Èè, mêmè, aci kàdi kunshiyacì ànu tusùnsukilà, bu lumingu lujimà nànku anyì bipìte apu.

<sup>13</sup> Ku musangu ne ku musangu, dîbà dyônsò, Cintu kampànda cítu ànu cìndimwija ne: "Umùkà ndà, umùkà ndà. Ndà mutàngile ku wesètè. Tùngunukà ne kuya ku wesètè." Èè, ndi . . .

Cìtu misangu yônsò ànu cìntàcisha. Kàdi mbyenzè ànu bu ne musangu wônsò . . .

<sup>14</sup> Mpindyewu, mvwa mu meeji àànyì mulongòlòle ànu bitòòke tòò bwà ne mu lumingu elu mvwa ngangata ndèkè mutangile ku Tucson, kûmywà ne cyà kafucila mwaba kampànda, bwà kwikalakù muvù wà mashìka ewu; bwà kubweja bânà mu kâlaasà, kubangila mu ngondo wa citèèmà. Mvwa ne mwaba awu. Kùvwà mene mwaba mumpèèsha kuntwaku. Kàdi kùdi cintu kampàndà cìdì . . . Nènku—nènku mêmè tuyè . . .

<sup>15</sup> Cikwàbò cintu cîndì njinga kwamba. Ànu kumpàlà kwà twétù kwibaka nzùbu ewu kaaba aka, nzùbu wa mpaasàtâ, mwaba wùdiye mpindyewu ewu, ncìvwa muswè kwibakapù to. Mamwèndè wa mukàjàànyì ùkaavwa mukùlákàjì. Ki yéyè kudila ne mwadi bwà bwalu abu, kwambayè ne: “Mêmè ncyénà ànu mwà kushiya màamù mwab’ewu to, mumanyè ne yéyè ùkaadi mukùlákàjì, ne mufwànyìne kupanga wa kumubèeja.” Èè, mêmè kuumvwa aci. Mêmè ntu ngumvwa aci. S’ùvwa mmamwèndè’s, wa bwalu maamù umwèpelè uvwayèku pèndè nendè, anyì wíkalayèku nendè. Pa nànkú, mêmè kuumvwa aci. Ki mêmè mêmè kusambilà Mukalenge, mêmè kwamba ne: “Mukalenge, bu mùdibi ne ncyénà munangè mwinè mwaba awu,” mêmè ne: “nsànkìshèku. Nènye kwônsò Kûdì muswe bwà mêmè kuya aku, nguumkilà nî mpenyì pônsò. Kàdi ncyénà muswè kubungamija mukàjàànyì to, bwà kumuumusha mwaba ewu, kuya nendè mu ditùngà dyenyi mùdiye kàyi mumanyàngànè ne muntu nànscha umwe to. Ne pashiishe mêmè ntu dìbà dyônsò ànu tuyè, nànscha mene. Nsànkìshèku ànu bwà ngìlkalè nendè mwab’ewu.”

<sup>16</sup> Nènku mpindyewu, pàkaadì mamwèndè mwangaciìbwé apa, ne tuyè mu Butùmbi, pashiishe ki dijinga dinènè dilwalwà cyàkàbìdì edi, nwamònù’s, mpindyewu bwà kutùngunuka. Ncyénà mumanyè cyà dyenza to.

<sup>17</sup> Ki pashiishe ditùkù adi pàvvà dilongesha edi dìvvà bânà bëètù bakùtùle myaba yônsò edi, Mêmè kwimana mu cyambilu musangu wa ndekeelu wûmvwà mwaba ewu mêmè kunwàmbila ne ncìvwa mwà kuyakù mu budimi bwà bwambi to pàvvàci ànu cìtùngunuka. Pa nànkú, bânà bëètù ne ngâsà yônsò kulongololabò byônsò abi. Byônsò mbitòòkesha. Munda mwà mèbà makùmi àbìdì ne ànaayi, byônsò bijikè nkong.

<sup>18</sup> Mpindyewu aci cìdi cìnkàngwila cyàkàbìdì budimi bwà bwambi. Ncyénà mumanyè cyà dyenza to. Ncyénà mumanyè njila wa kubwelela to. Ndi mulòmbe Mukalenge cìkèènà-kumònà. Ndi muMulòmbe bwà àngambilè cyà dyenza. Kàdi mMundekèle ànu musòmbe.

<sup>19</sup> Mpindyewu, makèèlèlè diloòlò awu pângümùshì bânà bônsò, mukàjàànyì ne bônsò, kubùùmusha mu nzùbu, mêmè kudilambula kùdi Mukalenge Nzambì. Ki mêmè kwambilà Mukalenge Nzambì ne: “Bu Wêwè mwà kumbèneshakù mu njila

wûnyaayà awu, nêñKukwâcîlè mudimu. Kâdi nebikengelè bwà Wéwè kundeeja kwâ kuya, ne mùshindù wà kuya, ne cyà dyenza.” Pa nànku, mêmè kudìlâmbula kùdì Mukalenge. Ne—ne mudimu wà bwambi ne byônsò, mêmè kuwùlâmbula kùdì Mukalenge. Ki mêmè kwamba ne: “Kwônsò kÙdì ùkàngula aku, cyônsò cyÙdì wenza aci, nênngeñdelè mu yêyè njila awu. Too ne paWàpengà njila apu, mêmè nêntungunukè ànu mündì nya emu too ne paWàpengà njila awu.” Ki mêmè kuMulòmba bwà kucitòòkesha bwà ncilu kuseeswishiibwa pashiishe to, bwalu ndi cyà bushùwà ngiitabuua ne tudi menemene ànu pa masangu a njila a cintu kampàndà bwà kwenzekaci.

<sup>20</sup> Ngäcyümvù bacyàmba mu cipròfetà mu dìndà emu kaaba aka kùdì Mwanèëtù Neville, anyì mucìfile pâmvwà mumanyè ne kùvwa—kùvwa nku cipròfetà aci kùvvwàye ûleedila. Mpindyewu, ki bwà cinyì, nngänùsambididì nwénù bônsò, ne ndi ne dijinga dyà nwénù bônsò nùnsambidilèku, bwà Nyumà Mwîmpè wàmònakù bwà kundombola ànu menemene kùdì kükèngelà bwà mêmè kuya, cìdì cikèngelà bwà mêmè kwenza, bwà ncyènjikù cilémà nànsha cimwè to.

<sup>21</sup> Nudi numònà’s, misangu yàbûngì, bantu bàtu bëèla meeji ne dipà dyà cipròfetà, Nzambi údi wàmba ànu ne: “Nênkwangâtè ànu wéwè ewu, ne nkusòmbeshè apa. Mpindyewu ndààku ànu apa nùnku.” Kâdi Yêyè kéné ùkwambila bintu byônsò abi to. Bu ne Üvwa mwà kukwambila, ndiitabuua dyà bucìmunyi kaayì dyûvvwà naadi? Nwamònou anyì? Wamònou’s, wéwè, Yêyè údi ùkulekela wimana wéwè nkààyeebè kutàmba mutu mukwàbò yônsò ewu. Nwamònou anyì? Nwénù nudi mwà kulwa kündì bwà kunkonka maalu kampàndà, ne Yêyè kacya kàtukù mwanji kupangila to Ütu munùpèèshe dyandamuna. Ncyà bushùwà. Èyowà. Kâdi ndi mwà kuMulòmba bintu bwànyì mêmè mwinè, ne misangu yàbûngì Yêyè ùtu ànu ùnshiya nkààyaaanyì, nwamònou’s, ùnshiya ànu ntungunuka ne nkabwelamù.

<sup>22</sup> Ndi ne maalu mpindyewu àdì àkèngelà bwà ngàndamunè mêmè mwinè, ne mapàngadika àdì àkèngelà ngàngatè. Ne edi ndyà mushinga mutàmbe bunène, mu mùshindù wà ncìyi menemene mwà kudyàngata ncìyi mutwishiibwe ne n’Yêyè udi wakula naanyì to. Nènku ndi—ndi... Nyewù kayi umpèèshakù cikèènà-kumònà. Mmùndekela ànu nkààyaaanyi nànku. Pa nànku ndi musòmbe ànu bu mwânà wa nshiyà, nànku awu, mu dìndà emu, ncìyi—ncìyi mumanyè ne kwâ kuya nkwepi to. Pa nànku, mêmè ndi mucìlâmbûle kùdì Mukalenge.

<sup>23</sup> Mêmè—mêmè kudyùmvwa dîbà adi ànu bu ne, mu kulòtòà kwâ cyôcì aci, bivwa bikèngela ngâàlukilè ku tabernacle eku nkwacishèku Mwanèëtù Neville too ne pàdì ànu cintu kampàndà cyènzekà mu lwendo amu. Pa nànku, nêmmatè mu njila amu.

<sup>24</sup> Ndi mukonke Mwanèëtù Neville katancì aka ne: “Èkèleeciyà ùvwa ùtanta bìshi?”

Ki yêyè ne: “Bîmpè.”

<sup>25</sup> Ne pa nànku ndi ngumvwa ne nucìdi ànu ne mapà à Nyumà ne bikwàbò munkaci mwènù, biikàle bikwàta mudimu, mapà à cipròfetà, ne—ne dyakula dyà mu myakulu, ne dyandamuna dyà myakulu, diinè ditúmvù kwéñjì katancì aka adi. Ne bintu abi bidi bikolesha èkèleeziyà, bikolè menemene.

<sup>26</sup> Kàdi mvwa ndyàmbidila, pàmwäpa dilòòlò edi ne ndi mufwànyìne, bu Mwanèètù Neville... Byôbì ne Nyumà Mwîmpè kî mmutùlombole ku cintu kampàndà cishìlàngànè to, dilòòlò edi ndi muswè kwikala ne... Nwénù bônsò, kumpàlà kwà nwénù kuumuka mu dindà emu, bwà kufunda lukonko ne kulùtèèka mwaba ewu, lukonko kampàndà mu meeji èbè, bwà twamònaku mwà kujandula cìdì èkèleeziyà wèla meeji. Ki mûshindù wùdì naawù bampaasàtà wà kujandula ànu cìdì mu myoyi yà bantu. Nènku muntu ne muntu wa kuniùdì udi ne lukonko, ùlùfundiè ulùtèkè apa nùnku. Wèwè kùyi ne kabèji bwà—bwà kulùfundapù mu dindà emu to, dîbà adi ùlùfundiè dilòòlò edi, kumpàlà kwà dîbà. Pa nànku, ndi muswè kwikala ànu ne dîbà dyàbûngi ne mwânyì mwônsò, pa yôyì ayî, bwà kuyïkenketa ne kunwàndamuna bilondèshile Mifundi.

<sup>27</sup> Nènku bu Mukalenge mwà kwanyisha, cyôcì diswà dyà Nzambì; ndi mwambè dîyì mwab'ewu ànu àbìdì àdi pansiì aña ne, ndi muswè kwakula neenù pa Bitampì mwandamutekètè byà ndekeelu byà...byà Bwàkabuulwibwà. Mpindyewu bu twêtù... Ncyéna mufwànyine kwangata Bitampì abi too ne ku ndekeelu cidimu eci to, bwalu bìdi byàngacila kuumukila ku nshapità mwiñ wà Bwàkabuulwibwà, too ne—too ne ku nshapità wa 19, bwà kujikija Bitampì abi. Kàdi bìsàtù anyì bìnaayi byà kumpàlà byà ku byôbì bìvvwa mwà kwandamunyiibwa mu dilòòlò kampàndà, ngeela meeji, Citampì cyônsò cyàngata dilòòlò dimwè.

<sup>28</sup> Mpindyewu, bu twêtù mwà kuumvwa, kumònà patùdì twimanyina pa Mukàndà wà Bwàkabuulwibwà awu, mwaba wùvvwà Èkèleeziyà mwangaciìbwé mu Butùmbi, pashiìshe bikwàbò byàcì bìdì bítàngila beena Yudà, kî ng'Èkèleeziyà to nànscha kakesè. Bìdi bítàngila ditungà dyà beena Yudà. Ki bwà cinyì bìdi bikèngela twàlukilè cyànyimà, kuumukila ku Dyambwibwa dyà Èkèleeziyà, bwà kwangata... Tudi tumònà apa cìdì cyènzekà mu cikondo cyà Bitampì abi aci, ne cikondo cyà Èkèleeziyà wa bàà Bisàmbà byà bendè. Èkèleeziyà mwikàle tuyè; ne ne ditungà dyà Izàlèèlè, bìdi byàlukila ne byàngata Izàlèèlè kubangila ku cikondo cìvwàbi biimànyìne, too ne ku cikondo cyà bwena leelù eci; too ne ku dilwa dyà Maasiyà, pààkidilàbo Maasiyà.

<sup>29</sup> Mpindyewu nwacyümvù anyì? Èkèleeziyà mmwângaciìbwé muulu. Nzambì mmutàngile dyàmbedi bwalu bwà Èkèleeziyà, Bikondo byà Èkèleeziyà. Tuvwa bangàte aci. Dîbà adi Èkèleeziyà mmwângaciìbwé mu Butùmbi. Pashiìshe Nyumà Mwîmpè üdi

wàlukila ùkangata Izàlèèlè, bu ditunga. Ne ùcìtùùlula too ne apa, pàdì Didyà dyà Dibanjì munkaci mwà kwenzeka apu, ne pashiishe kuByaluja cyàkàbìdì ku ndekeelu kwà ciinè cikondo aci. Nêmbandishè mboodì wanyì wa kufundila, nènku nêngìkalè mwà kucizola ne kucilongesha, pààlwà cikondo. Pashiishe Mukalenge ùdi wàlukila ne Mukàjì-musèla, ne Izàlèèlè ùmumònà. Nènku, kaa, ncikondo kaayì cìikalaci's wè!

<sup>30</sup> Mpindyewu, kumpàlà kwà twêtù kumònà mwà kutwangaja cyôci eci mu mùshindù mujaalàme, kùdi dileesòna dinène didi cilèndwishi kùdi beena téolòjì ne bààbûngì, ne balongeshi munda mwà cikondo cijimà, ne beena Église de Christ ne aba bâdì bâlwà bwà kutèèleja cyôci eci, mbwena kwamba ne, Mbingu Makùmì Mwandamutekètè yà Danyèlè. Tudi ne... Katwèna mwà kuya kule menemene mu Bwàkabuulwibwà patùdì katùyì baswikákàje Mukàjì-musèla ne Izàlèèlè ne Mbingu Makùmì Mwandamutekètè yà Danyèlè to. Nènku pàmwàpa, bu Nzambì mwà kwanyisha, mu mùshindù wà ne bu Yéyè mwà kwakula naanyì mu matukù àcìlwalwà, bwà kwakula pa yìmwè yà ku Mbingu Makumì Mwandamutekètè eyi...anyì, kí m'Mbingu Makùmì Mwandamutekètè to, kàdì Bitampì mwandamutekètè byà ndekeelu. Pashiishe mu dyàlumingu dìlwalwà, nênteetè bwà kwangata Mbingu Makùmì Mwandamutekètè yà Danyèlè, mu dyàlumingu dilwalwà edi, bu Mukalenge mwà kwanyisha. Nènku dîbà adi aci necìkangulè cyalu pashiishe, bu Yéyè mutùlombòle, bwà kubanga bikwàbò abi. Èè, netùjandulè kubangila ànu apu.

<sup>31</sup> Mêmè ne Mwanèètù Neville netùkwatè mudimu pàmwè pa cyôci eci, ne kwenza cyônsò citùdìku mwà kwenza bwà dyàkalenga dyà bantu.

<sup>32</sup> Mpindyewu, patùdì twalukila musangu wônsò, tudi tusambidila babèèdì, tutu misangu yônsò ànu ne disànkà dyà kwenza nànkù. Ne pàmwàpa nêngìkalè ncyènà mu disangisha dyônsò, bantu bôbô biikàle bàsaama, bwà kubàsambidila.

<sup>33</sup> Ncyéna njinga bwà kwenza kàbìdì dijingulula to. Nwamònù's, mpindyewu cidi cyenzèke ncyôci eci. Nkààdi muteetè. Ne ndi mumanyè ne nkààdikù mwenzè bintu bìdì bibì; kàdi nkààdi muditàcìshe bwà kwikala ne nsòmbelu mutàmbe kwikala pabwipi ne Nzambì, dîbà dyônsò, bwà Nzambì, mùshindù awu ngùvwà bikèènà-kumònà ebi mwà kwenzeka, mùvvwàbi mwà kwenzeka. Nànscha mene bantu bàvwa mwà kujìmija bintu, ne kumbiikila ku téléléfonè, kundòmba bwà kuya kasambilà Mukalenge, bwà kukonka ne bìvwa penyi. Mwàkajimijà Ishàayì tumpundu, ne nsongààlùmè ayi kuyayì kapeta mupròfetà, ne yéyè kubàmbila mùkaavwà tumpundu atu tumanè kwalukila kumbèlu. Ne bikwàbò mùshindù awu, aci's cidi ànu címpè menemene. Kàdi bìdì bikafika ku divula bikolè, mu mùshindù wà ne bantu bààbûngì... Kacyi ànu mu mwaba bu ewu nùnku to; mpa buloba bujimà, nwamònù's. Pa nànkù

cidi ànu cilwa, cìnsiya mu mùshindù wà muumvwè maalu mantondè, ne cìkulama mubìndùlùke dìbà dyônsò, bikafika too ne mu mùshindù wa . . .

<sup>34</sup> Nènku ki cyàkafikishà bâna bètù abu ku dibanga dilongesha adi, dyà ne mêmè mvwa Mukalenge Yesù Kilistò mwandàmùke mubidi. Ne tudi bamanyè ne aci ncifwànyine ànu kunyangakaja Mudimu wa bwambi wônsò, ne kwela bundù pa Kilistò ne bikwàbò byônsò. Nwamònú anyì? Pa nànkú ki bwà cinyì byàkakèngela bwà mêmè kubànyùkusha bikolé, bwà kucìimanyika dyàkàmwè, bwà kubàmanyisha ne aci kacìvwa cyà kùdì Nzambì to, cìvwa cyà dyabùlù. Nwamònú anyì? Kàdi mbantu bimpè. Ne aci cyáleejì ne bantu abu mbaledìibwe cyàkàbidì ku Nyumà wa Nzambì, bwalu, pàmònubò Bulelèlà ku Mifündu, bôbò kwalukila kùdì Nzambì, ànu menemene, nwamònú's, dyàkàmwè. Pa nànkú, aci cyáleejì ne ùwwa n'Sàtaanà ûteeta bwà kwenza cintu kampànda ne bantu; bàvwa bônsò bantu bàà difwànà dyà Nzambì, beena Kilistò.

<sup>35</sup> Ne cyàfikishì bààbùngì bàà kùdòbo ku dingambila ne: "Mwanèetù Branham, twápecì mpindyewu dikweyemena dyàbùngì kutàmba mutùvvwàku naadì kacya kwônsò eku."

<sup>36</sup> Bwalu, mònaayi ne, ne dipà dìdì Nzambì mumpèèshe edi, címvwà mufwànyìne kwikala mwenzè ne cyôcì aci ncinyì? Mwelè ditùngà ku makàsà àànyì, anyì, bantu's. Citùdì twétù tubìkila ne *nditunga* aci, kí "n'kosmos" ewu, tu-tuzòòlò twà kumana naatù mikìlyà ne bikwàbò atu to. Ndi njinga kwamba beena Kilistò, mwna kwitabuuja mulelèlà, udi busùkusuku bwà . . . Patùdì twakula bwà *ditunga*, tudi tuyiisha bwà "bantu bàdì baledìibwe cyàkàbidì," ki citùdì twamba, ditùngà. Kí ng'ànú bantu bônsò bàdì pambèlu apa aba, bàdì ne bukooyà ne bitoci mutùdi basòmbèlé pa buloba apa aba to, aci cidi ànu—aci cidi ànu lupwishi lwà buloba lùdì lwàlukilà. Ndi ngamba beena Kilistò baledìibwe cyàkàbidì, bantu bàdì beena Kilistò balelèlèlà.

<sup>37</sup> Ndi mwindile bwà muntu kumbündulayè cyàkàbidì pa bìdì bítàngilà cintu kampànda. Muntu kampànda mmulwè kündì àbìdì àdì pansi aa, wàmba ne: "Cingènyingenyi ciinè's, cyà ne Kilistò wàkatwila mate pansi aci, ne mate Èndè awu, wènza citàpitàpi ne ùcimeteka pa mësù à muntu apu." Yéyè ne: "Mùshindù mwinè wùvvwàci cyà bukooyà, cyà manyaanù's, bwà Yéyè ùtwila mate, ne mate Èndè à mukana Mwèndè awu! Mùshindù mwinè wùvvwàbi kabiyi byà mankendà's, bwà kutwila mate mu lupwishi, ne kwenza citàpitàpi cyà bitoci kàdi kucìlaaba pa mësù à muntu."

Mêmè kwamba ne: "Kàdi's wàkaalukila mwikàle ùmòná." Nwamònú's, s'ncyôcì aci.

<sup>38</sup> Ne muntu umwèumwè awu! Mbakàngùle citùùdilu cyà beena kaabutakà kuntu kwàka pabwípì ne kwànyì kumbèlu,

nudi bamanyè's, ciinà cyà mâyì cyà dyowela. Nènku—nènku muntu awu ùdi ne tìkê bwà yônsò wa ku bânà bèndè bwà kwikalabò bâkowela mu cyôci ciinà cyà mâyì aci. Ne yéyè ne mukjàjèndè, bâtu bàyakù pààbò, mu cyôci ciinà cyà mâyì aci. Nwamfwilaayikù luse, nwénù bânà bêtèù bâà bakàjì. Kàdi mwômò mütù bakàjì abu bàya kowela amu, bakàjì lukàmà, anyì nkàmà yibidì, ditükù dyônsò; bakàjì, bukooyà bwônsò abu ne bikwàbò, ne bakàjì abu leelù ewu, ne bâdîsàmpulwila mu mâyì amu, bukooyà ne manyaanù awu mukana mwàbò amu, bâàmina bâàtwila. Ndi muswè ànu àmbundè, nwamòn'u's.

<sup>39</sup> Bâvwa bàmba ne: “Bu—bu Kilistò mwikàle ne mwoyi leelù ewu, s'bâvwa mwà kwikalala baMukwàcîshe bwà cintu cyà bukooyà aci.”

<sup>40</sup> Kàdi bwà aci udi wamba bìshi? Ndi mutwîshibwe ne nudi nuumvwa cîndì muswè kwamba aci. Bâdi bàya buludì mu ciinà cyà mâyì aci, ne bâàbûngì bâà kùdîbo ne masaamà, à kàsèndà, masasà, ne bikwàbò byônsò, ànu mwômò amu mene. Nènku biikàle ànu nuàtwila mukana mwènù amu, ne bikwàbò byà mùshindù awu, ne biikàle nudîsàmpulwilamù mùshindù awu. Nènku aci ki mankendà's, mu bushuwà bwà bwalu?

<sup>41</sup> Pa nànku, kaa, ekèlekèle, edi ditükù ditùdì ne mwoyi edi, mwanèètù wa balùme, mwanèètù wa bakàjì! Dîbà dyákùmbanyi bwà Dilwa dyà Mukalenge! Nènku Èkèleeziyà ùdi ne ditèkemena dimwèpelè, ne n'Dilwa dyà Mukalenge.

<sup>42</sup> Èè, kî mmêmè udi mwà kwimanyika bintu abi to; kî ncìdi cikèngelà to. Bible ùkaadi mananè kudyànjila kwamba ne bìvwa mwà kwikalakù. Mêmè ncyêna mwà kubìimanyika to. Kàdi ndi muswè bwà dîyì dyànyì kwikaladì dikwàta pa mukàbà wà mèyì mu Dyulu ne, mêmè mvwa mbèngangana naabì, pààlwà dîbà bwà Cilumbulwidi. Mvwa mbèngangana naabì.

<sup>43</sup> Mêmè ncìdi ànu ngiitabuuja ne Bible ewu's n'Dîyì dyà Nzambì. Pashiishe kakwèna cikwàbò cintu nànsha cîmwè pa buloba, cyà cibèngangana Nendè, cîdîku mwà kuMwimanyika. Kàdi Bible ewu kaaba aka, eci ki Bulelèlè, eci ki Dîyì dyà Nzambì. Pa nànku mpindyewu, tûkokàayì ànu bilàmbà byètù—byètù—byètù bìdî bìkwàta lupeepèlè, ne twélàayì lwongò ku mwelelu wà ditalala wà Mwaba wà Diikisha. Nènku—nènku netwikalè mwà kwasa lwendo mu màzuwà mààlabà tuye ku mwaba kampànda, kàdi twänjâayì ànu kwela lwongò mpindyewu ne kutèèlejakù Dîyì dyà mukana mwà Taatù wetù wa mu Dyulu pàdìYe mufwànyine kwakwila neetù ku Dîyì Dyèndè, mutùdì batwîshìibwe, leelù ewu.

<sup>44</sup> Nènku dilòòlò edi, mpindyewu, ûlongololè kaalukonko kakesè kaùdì mwà kwikalala naakù pa bwalu abu. Mpindyewu, kî ncintu cîkàlè mwà kwenzela muntu bibì to. Wêwè wenza nànku, dîbà adi aci cidi... Ncyêna mufwànyine kwandamuna alu nànku to, twamb'eku twamb'eku, nwamòn'u's. Kàdi wêwè,

cintu kampànda cikwàbò, wamba ne: “Èè, mpindyewu, mêmè mwenzè cintu *kampànda*, Nzambi ûdiku wàmба ne bìvwa bìkèngela bwà twêtù kwenza cikampànda anyì?” Anyì, nudi bamanyè’s, tukonko tukesè pa mwoyi wèbè. Anyì ne: “Tudi ne mapà ènzekà munkaci mwètù, Mwanèètù Branham, nènku bìvwa bìkèngela bwà twêtù kukwàta naawù mudimu mùshindù *kampànda* anyì mu mùshindù *kansanga* anyì? Anyì ne, cìvwà cikèngelà bwà twêtù kwenza ncinyì?” Cintu kampànda cîndì mufwànyìne kukwandamwina mu Mifündu, nudi numònà’s. Üfundè kaacintu kakesè. Ndi mufwànyìne kwikala ne disànska. Nènku kwôkò kakuyì nànsha lùmwè to, dîbà adi nêngàngatè ànu cyena-bwalu cyà mùshindù kampànda, ne kunùyiisha dilòolò edi, bu Mukalenge mwà kwanyisha. Eci’s ndyàlumingu, nènku ndi . . .

<sup>45</sup> Dyàlumingu dishàâle, mvwa mwasè lwendo bwà kuya kwà Mwanèètù Cauble. Kâdì mêmè kuumvwa ngonga wa èkèleeyizià ewu ûdila, pàanyì mwikàle ànu mbànda mpweka mu lubànzà amu. Ncìvwakù mwà kucitwàla to. Ki cyônsò civwàku’s. Mêmè kunùmvwa, pa nànku kukèngelabì ànu bwà mêmè—mêmè—mêmè kulwà apa.

<sup>46</sup> Pa nànku mpindyewu twänjààyaaku ànu kwinyika mitù yètù mpindyewu bwà twàkulèku ne Mutùfùki, ne pashiìshe mu mwakù wà disambila. Kùdikù muntu ne dilòmbà dyà pabwàdì anyì? Elààyi ànu byanza byènù muulu, ambààyi ànu ne: “Ndi . . .” Dìmanyìshè ànu cyanàànà. Nzambi ngudi mumanyè cidi pa mwoyi wèbè apu. Mpindyewu shààla ànu mulamè dilòmbà dyèbè mu meeji èbè amu.

<sup>47</sup> Nzambi mutàmbe Cijila, Wéwè utu mufûke Maulu ne buloba ku Dîyî dyà mukana Mwèbè, ku meeji à mu mutù Wèbè. Nyewù tubwela mu Bwikadi Bwèbè, tubwelela ku Yesù Kilistò, Mukalenge wetù, bwà kuKwela twasàkidila bwà byônsò byÜdì mutwènzèle. Ne tudi ne kusàkidila kwàbûngì Kûdì, Mukalenge, mu dîndà emu, bwà kumanya mwaba wutùdì biimànyìne, kumanya kaaba katùdì mu dîndà emu, ne bwalu-bulonda bwà cikondo, ne matùkù acìwalwà. Bamanye leelù ewu ne, ku ngâsà wa Nzambi, kutùdì basukula mu Mashì à ku Kàlvariyo, bwà ne tudi balongolola, ne diitabuuja mu myoyi yètù, bwà kutwilangana Nendè bu ne bìvwa bìkèngela bwà kulwa Yè leelù ewu. Biwwa bìkèngela twêtù kwamba ne: “Nànsha nànku, lwâku, Mukalenge Yesù.”

<sup>48</sup> Nènku nyewù tumònà mpèkaatù ùngwila mushikì, mu mùshindù wà bìmwèka ànu bu ne buloba bùdi bütènkakana ku bwenzeji bwà mpèkaatù. Mùshindù mwiné wùdì dinwà dyà maalà, dinayà dyà twartà twà mfrangà, dipicisha dyà dîbà mu maalà ne bisànkasanka, ne dyenda dyà butakà, ne, Eyì Nzambi, bukooya, ne manyaanù ne bintu bibì kumònà byà bantu. Ne mùshindù mwiné wùdibò, bu ne bàvvakù mwà kumanya’s, Mukalenge! Bantu abu, bâdì bàvvàla mùshindù awu tulàmbà

twà kale twà katùyi tûneemeka Nzambì atu, ne bâpâtuka mu mùsèèsù mwàmwa, mbamanyèku ne kabèèna cîngâ cintu ànu bîshiishì ne lupwishi, ne pàmwäpa mu lumingu lùmwè bîshiishì nebiïkalè bîdya mubidi wùdìbo munkaci mwà kutùmbisha awu anyì? Mbamanyèku ne mikùmbi yà yelèkè neyìwùdyè, ne musùukà wàbò newikalè mu Cyendèlèlè kampàndà mwàmwa kawùyi ne Nzambì, kawùyi ne Kilistò, kawùyi ne ditèkemena, wènda wùtùkina mu ndòndò wa wùdyùmvwa mujimìne, bwà kwikalala ànu mubùtùdìibwe ku Dilwa Dyèndè anyì? Éyì Nzambì wa yàayà, tûpèeshèku mèyi à—à didimwija, bwà twamònaku mwà kudìmwija musùukà wônsò ku njiwù yìdibo bàseemena naayi pabwîpi eyi.

<sup>49</sup> Ikàlakù neetù leelù ewu. Tûpèeshèku “mèyi à lungènyì,” mwàkambà Solòmò musangu kampàndà mu Mwambi ne, tuvwa mwà kwikalala “biibakì bàà lungènyì,” ne tuvwa mwà kwikalala “balami bàà mìkòòkò bàà disangisha edi.” Nénku tudi tulòmba, Mukalenge, bwà patùdi tukèbulula mèyi à kwamba apa, bwà kwikalawò—kwikalawò midimu myowela byanza yàbàkulàku mwoyi wùdì mu lukèngelu kaaba aka mu dindà emu awu.

<sup>50</sup> Katwèna balwè kudìsangisha mwinshi mwà musàkà wà luuyà lukolè ewu leelù ewu, ànu bwà kutùmònabò nànsha, kàdi tudi balwè mwaba ewu mbwalu tudi baKunangè, ne bwalu tudi ne dijinga dyà kuKutèèleja. Wêwè udi Mutùnangi wetù utùdi banangè, ne tudi tujinga kuumvwa Mèyi à kûdì Wêwè. Tudi ne kusàkidila bwà bitùkaadì bamanè kuumvwa. Nebishaalè neetù ntàntà mule. Mpindyewu tûpèeshèku citùpà cyÛdì naaci bwètu twêtu leelù ewu, patùdi baKwindile kàbídì apa. Tudi tulòmba nùnku mu Dînà dyà Yesù, ne bwà bwalu Bwèndè. Amen.

<sup>51</sup> Mpindyewu tukààdi . . . [Mwanèètù wa bakàjì kampàndà ùdi wàkula mu myakulu, mwanèètù wa balùme kampàndà ùdi wàndamuna—Muf.]

<sup>52</sup> Tudi ne kusàkidila bwà mèyi à makùmbù à kùdì Nyumà aa, àdi àtwàmbila ne àtùdìmwija bwà kutàbaleela Mèyi pàmwäpa ìkalà Nyumà Mwímpè mwà kutwàmbila leelù ewu. Kàdi katwèna ànu bamanyè cìdìYe naaci mu cibùcìlu bwètu twêtu to, kàdi tudi cyà bushùwà bamanyè ne kùdi ne cyà kwikalala cintu kampàndà cììkalàYe mwà kupàtula. Pàmwäpa ní lukonko kampàndà lùdi mu meeji èbè amu, IwikalàYe mwà kwakwilapù. Yéyè mmufwànyì kucyàmbidila mu Diyiisha dyà mu dindà emu edi. Yéyè mmufwànyine kucyàmba dilòòlò edi mu disangisha. Yéyè, pa dîbà kampàndà leelù ewu, Ùdi munkaci mwà kuteeta bwà kucyènza, müdìbi bìmèka, ùdìmwija muntu kampàndà bwà kubákulayè Mèyi awu.

<sup>53</sup> Mpindyewu bwà kubuulula mu Dîyì difunda, tuyaayi mu Mukàndà wà Ekèsòòdè, bwà dîleesònà dyà Kàlaasà kàà Dyàlumingu.

<sup>54</sup> Nudi ne mudimu wà dibàtiiza anyì? [Mwanèètù Neville ùdi wàmba ne: “To, kî ntoo ne pa díbà isambòmbò dilòòlò edi to.”—Muf.] To. Mudimu wà dibàtiiza wùdi pa díbà isambòmbò mu mapingaja emu.

<sup>55</sup> Tùyaayi ku nshapità wa 17 wa Ekèsòòdè, biikàle tubangila ku—ku mvensà mwi5, ngeela meeji, mvensà mwi5 ne mwi6 wa nshapità wa 17 wa Ekèsòòdè.

*Nènku MUKALENGE wàkambila Môsà ne: Ndà kumpàlà kwà cisàmbà, ne angàtà bàmwè bàà ku bakùlù bàà Izàlèèlà pàmwè neebè; ne dikombo dyèbè, dyûvwà mutuutè naadì musùlù adi, dyângâtè mu cyanza cyèbè, kàdi ùye.*

*Mònà, mêmè nêngùìmanè kumpàlà kwèbè...pa lubwebwe mu Holèbà; nènku...wêwè neùtuutè lubwebwe alu, ne nemùpatukè máyi, bwà bantu bààmònà mwà kunwà. Ne Môsà wàkenza nànkú ku mésù kwà bakùlù bàà Izàlèèlà.*

<sup>56</sup> Mpindyewu byôbì bikèngela bwà mêmè kwinyika eci ne mmutù-wà-mwandà mukesè wà Kàlaasà kàà Dyàlumingu, ndi muswè kwangata eci bu cyena-bwalu bwà dileesònà dyà mu dìndà edi ne: *Mâyi Àdì Anukù Ápàtuka Dibà Dyónsò Mu Lubwebwe.*

<sup>57</sup> Tudi bamanyè ne Izàlèèlà ùtu misangu yônsò ànu cileejilu cyà mu maalu-malonda cyà èkèleeziyà. Bwalu, Izàlèèlà ùvwa cisàmbà cyà Nzambi too ne pààkapàtukàbo mu Èjiipitù, ne pashìishe kwikalabò èkèleeziyà wa Nzambi bwalu bâvwa batàpùlùke ne bakwàbò bantu bàà pa buloba.

<sup>58</sup> Nènku patùdì batàpùlùke ne bakwàbò bantu bàà pa buloba, díbà adi tudi tulwa èkèleeziyà. Kàdi patùcidì ànu babwelàkànàngàne ne bakwàbò bàà pa buloba, díbà adi katwèna mu èkèleeziyà nànsha. Mpindyewu ndi mutwìshìibwe ne aci cidi ciya mu ndòndò menemene, cìkakwàta mwaba wàcì. Nwamònú’s, katwena èkèleeziyà to patùdì katuyi batàpùlùke ne bàà pa buloba. Tùtapulukààyi, pàtukààyi munkaci mwà bantu bàà nsòmbelu wa bukooyà, kanubwelakanyi naabò, ne kanwìkadi baabanyanganyi bàà mpèkaatù yàbò to. Kanwìkadi mu cikòkedi cìmwè ne beena bupidyà to, kàdi tàpulukààyi ne bintu byà pa buloba.

<sup>59</sup> Nènku pàvwà Izàlèèlà mu Èjiipitù, bâvwa cisàmbà cyà Nzambi. Pashìishe pààkabiìkidiibwàbo bwà kupàtuka, anyì pààkenzàbò cimwangì, munkaci mwà kupàtuka, díbà adi bààkabiìkidiibwa ne ng’èkèleeziyà, bwalu díbà adi mpààkatàpulukàbo ne bakwàbò bàà pa buloba.

<sup>60</sup> Ne mwakù mwinè èkèleeziyà wùdi wùmvwija ne “babììkidiibwe bwà kupàtuka” *Ekèsòòdè*, “pàtukààyi.” Yônsò wa kutùdì, twêtù bu beena Kilistò, tudi benzè cimwangì munda mwà mwoyi wetù. Tuvwa ne cikondo citwàkabiìkidiibwà

bwà kupàtuka munkaci mwà beena dyètù, kubiìkidiibwa bwà kupàtuka munkaci mwà bantu bàtùvwàku musangu kampànda naabò mu bwobùmwè, ne kulwa bantu bashììlàngàne, bwà kwenda ne bantu bashììlàngàne bàvvwà bènza maalu mu mùshindù mushììlàngàne ne bààkula mùshindù mushììlàngàne. Cìwwa ncimwangì mu nsòmbelu wetù.

<sup>61</sup> Cileejilu cilenga cyà dikèmà cìdì Izàlèèlè mutùpèèshe, cyà pààkabàbìkìlì Nzambi bwà kupatukabo aci. Bààkenza cimwangì, ne bààkapàtuka munkaci mwà—mwà bantu bàà pa buloba, ne bààkalwa ditùnga ditàpùlùke, bwà Nzambi, cisàmbà cyà pabwaci. Bààkenda mwinshi mwà mindidimbì yà nkwaswa wa ngâsà. Bàvwa basòmbèle ne bëndela ku Dikunji dinenè dyà Kapyà. Ne Nzambi wàkabàpàtula mu Èjiipìtù, kuya naabò ku buloba bùvvwà Ye mulayè.

<sup>62</sup> Nènku, mu cimwangì eci, bààkapèèshiibwa mulombodi wa nyumà, mulombodi, uvwa Môsà, mupròfetà munène mwela maanyì uvwa mu—muntu munène. Üvwa muntu wa difwànà dyà Nzambi, ûvwa muledììbwé muntu wa difwànà dyà Nzambi. Nzambi wàkamubìkìlì kumuumusha kùdì mamwéndè, kumpàlà mene kwà cikondo aci; Nzambi wàkamujidila kumpàlà kwà difükà dyà dyulu ne buloba, bwà kwikalayè mulombodi bwà lukòngò alu, bwà kutwàdilayè cisàmbà cimwangì eci.

<sup>63</sup> Mwab'ewu kùkaadi cikondo kampànda, ngâkaakula ne bânà bakesè mu tabernacle emu, ne kubènzela kaadiyiisha kakesè; ne kwamba, anyì kufila kaacifwànyikijilu kakesè kàà mùvvwà Yoshèbèdà, mwàkasambilàye, yéyè ne Amram, tatwéndè wa Môsà awu, pa kwenza kwà cintu kampànda pa bìvvwà bitàngilà disùngila dyà cisàmbà aci. Nènku Amram kumònayè cikèènà-kumònà cyà Nzambi mwimàne, anyì Mwanjèlo, ûfunkuna lwà ku nord, ne ùmwambila cìvvwà mwà kwenzeka. Ki Môsà mwânaà awu kulediibwayè. Ne bôbò kabààkaciïna mèyì matùma à mfùmù to, anyì mifuunu yèndè ayi. Bàvwa bamanyè ne Nzambi ûvwa ne cyanza Cyèndè pambidi pàà Môsà, ne aci ncìvvwà cikòse bwalu. Ncyà bushùwà. Cìvvwà mfùmù awu wàmba nànsha ciikàle cinyì, cìvvwà beena maalu à cidiìdì bàmba nànsha ciikàle cinyì, cìvvwà nî ncinyì nî ncinyì cyàmba nànsha ciikàle cinyì, bôbò bàvwa bamanyè ne Nzambi ûvwa ne cyanza Cyèndè pambidi pàà Môsà. Pa nànku kabààkaciïna bwà kumulekelela nànsha, ànu munkaci mwà ngandù amu mene; pàvvwàyi yônsò ànu midyundile ku didyà dyà bânà bakesè bàà beena Ebèlù abu, bwalu bàvwa babeelela ngandù ibadya muntwamu. Kàdi nànsha nànku Môsà wàkateèkiibwa mu kalààlù kakesè ne kutùmiibwa buludì munkaci mwà ngandù ayi, ànu munkaci mwàyì mene amu. Mbwalu, bôbò kabàvwa bàcìïna cintu nànsha cìmwè to, bàvwa bamanyè ne Nzambi ûvwa ne cyanza Cyèndè pambidi pàà Môsà.

<sup>64</sup> Èè, mpindyewu, bu ne tuvwakù ànu mwà kumanya cintu cìmwècìmwè aci ne, Mulombodi wetù munènè awu, Nyumà

Mwîmpè, Nzambì ngudi muMutùme. Ne Yéyè ngudi Mulombodi wetù. Ne cìdì bàà pa buloba bàmba nànsha ciikàle cinyì, ne nànsha banùsekè ne banwélùlwile bìshi, twêtù tudi tulonda Mulombodi wetù! Nzambì mmutùme Nyumà Mwîmpè bwà kwikalà Yé Mulombodi wetù. Nwamònù anyì? “Katancì kakesè aka bàà pa buloba kabààkuMmònà kàbìdì to. Kàdi nwénù nenùMmònè, bwalu Néngìkalè neenù, munda mwènù mene, too ne ku ndekeelu kwà buloba.” Pa nànku, Mulombodi wetù munène awu ùdi neetù, Nyumà Mwîmpè awu. Mpindyewu butùdì naabù mbwà kulonda Mulombodi ewu ne kwenza ànu menemene mùdìYe wàmба bwà kwenza. Ne Mulombodi ewu kààdyàkutùmushakù mu kajila to, Yéyè neàtùlamè dìbà dyônsò ànu mu kajila kàà Mifündu. Kàdi Yéyè kààdyàkuyakù ku luseke *kampànda* bwà cintu kampàndà, ne luseke *kansanga* bwà cintu *kansanga* nànsha. Yéyè neàshaalè ànu kacya wàlulama mu njila wa Mifündu.

<sup>65</sup> Nènku Môsà ùvwa ne njila uvwayè ne cyà kuiishila Izàlèèlè, ne pashìshe kulonda buludì ne kukòsolwela mu Mbû Mukùnze, kukòsolwela buludì mu Yadènè, kubwela buludì mu buloba bulaya, kupàtuka buludì ne kukòsolwela mu cipèèlè. Kabivwa ne Môsà ngwâkapàtuka mu njila to. Kabivwa ne Nzambì ngwâkapàtuka mu njila to. Bantu mbààkapàtukà mu njila, kujuulaci ndululu. Pa nànku, twànjààyibì kwelangana meeji pa maalu aa mpindyewu. (Mfwìlìààyikù luse.)

<sup>66</sup> Môsà, bu mulombodi mwela maanyì. Ndekeelu wa byônsò, pààkamanàye kuleeja bantu, ku bimanyinu ne maalu à kukèma, bìvvà ànu Nzambì nkààyendè mwà kwenza, yéyè wàkenza bimanyinu ebi ne maalu à kukèma kumpàlè kwà bakùlù bàà Izàlèèlè, ne kumpàlè kwà Izàlèèlè, mu mùshindù wà ne bààkatwishiibwa ne Môsà ewu nguvwa mwela maanyì uvwa ne cyà kubàpàtula mu ditunga edi, kuya naabò ku buloba bwîmpè bùvwàbo babàlayè abu. Pashìshe pààkamònàbo bintu binène byàkenzà Môsà mu dînà dyà Nzambì ebi, bààkiitaba bwà kumulonda. Ki kubàpàtulayè, kubàlombola ùkòsolwela mu Mbû Mukùnze, kukòsolwelayè mwômò amu, pàvwa mpa buloba bûme, ne kuyabò mu lwendu lwà mu cipèèlè, lùdì lùùmvwijà cikondo cyà mateeta.

<sup>67</sup> Pàdì muntu wàkidila Kilistò bu Musùngidi wendè, maalu ônsò àdi mu katòngòbèlè. Kàdi, kumpàlè kwà mwinè muntu ewu kubwelayè mu dibàtiiza dyà Nyumà Mwîmpè; muntu ewu, ùdi ne cyà kwanji kupicila ku mùshindù mulongolola wà kujidiibwa. Üdi ne cyà kupicila mu eikondo cyà dyediibwa ku mateeta mu nsòmbelu wendè. Nwénù bônsò aba nukààdi bapicilemù. Wàkapicila mu cikondo cyà dyediibwa ku mateeta eci. “Mwânà wa balùme yônsò udi ulwa kùdì Nzambì, ùdi wànnji kwediibwa mfimbù, kunyookiibwa, kutuciibwa nsokoci. Kàdi twêtù katùyi mwà kutwàla dinyooka to, dìbà adi bìdi bïleeja ne katwèna bâñà bàà Nzambì to; tudi bâñà bàà mu masandi, katùyi bâñà bàà

Nzambì to,” mmùdì Bible mwambè. Kàdi twêtù mwà kutwàla dinyooka, bamanyè ne “maalu ônsò àdì àkwàcishangana bwà dyàkalenga dyà bâdì banangè Nzambì,” díbà adi tudi bânà bâà balùmè ne bâà bakàjì bâà Nzambì, díbà adi Yéyè ùdi ûtùtwa citampì cyà Nyumà Mwîmpè too ne ku ditùkù dyà bupikudi bwètù. Nwamònù’s, ki dinyooka ndyôdì adi, cikondo cyà diteeciibwa dikolè, cintu citùdì tupicilamù aci.

Nènku Izàlèèlè, bu cifwànyikijilu cyà mu maalu-malonda, bivwa bikèngela kupetayè dinyooka edi.

<sup>68</sup> Mpindyewu, pàvvwàbo mu Èjiipìtù apu, ne Nzambì wàkatùma Môsà. Ki kwololayè dikombo, ne nkùpà ne nkùsù kulwayì pa buloba. Kudyòlolayè muditàngìje ku díbà, ne díbà kubweladì. Kudyòlolayè pa mâyì, kwandamukawù mashì. Mònà’s, Izàlèèlè ùvwa ùsanganyiibwa mu Kaanàànà...lwà mu—mu Gooshènà, bâpìcila ànu mu cikondo cyà butùmbi; díbà kadyàkabwelakù to, bipùpù kabyàkabàtuutakù to; mònà’s, bòbò bâvwa ànu bâpìcila mu cikondo cyà butùmbi’s!

<sup>69</sup> Ànu cyûvwà wêwè mwenzè pawàkasùngidiibwà dyà nzànzànzà aci. Bintu byônsò, maalu ônsò avva malenga malaya, ne bantu bônsò kulwabo ne kalolo. Nènku, kaa, ekèlekele, maalu ônsò àvva ànu mîmpè pàwàkasùngidiibwà dyà nzànzànzà apu! Pashìshe kulwakù cikondo cyà dyediibwa ku diteeta, cikondo cyà dinyooka, cikondo cyà kujidiibwa, udijidila wêwè mwine ku bintu byà pa buloba, “kutèèka ku luseke majitu àdì àkujìngila bipeepèlè menemene.” Wêwè, wêwè muntu mulùme, kukèngelabi bwà wêwè kulekela dinwà dyèbè dyà mfwankà, kulekela dinwà dyèbè dyà maalà, kulekela diya dyà ku nzùbù yà manàyì à billards, manàyì èbè à twartà à bufùkù bujimà awu. Bintu byônsò abi, kukèngelabi bwà wêwè kudijidila ku byôbì, ku diitabuuja mu Mashi à Yesù Kilistò. Udijidila wêwè mwine! Kukèngelabi bwà nwénù bakàjì kulekela nsukì yènù yileepa, kuleepesha nkanzu yènù, ne kwenza maalu bishìllàngàne ne munùvwà nwenza amu. Cikondo cyà didijidila! Misangu yàbùngì bâvwa mwà kutomboka kàdi kwalukila cyànyimà; èè, awu kí mmwânaà wa Nzambì to, nwamònù’s. Mwânà wa Nzambì ùdi ûtàngila buludì ku Kálvariò, ne ùmanya ne mbwà dyàkalenga dyèndè.

<sup>70</sup> Nànku díbà adi cikondo cyà nshintùlùkìlù aci, ki pààkalwà dipidya dinènè dyà diitabuuja mpôpò apu, mu Izàlèèlè. Mu cikondo cinène eci cyà bantu bûle tèntè eci, díbà adi bantu kubangabò kupidya diitabuuja, bùùmuka ku luseke bàya ku lukwàbò. Díbà adi mu yàbò miyiikì: “Èè, tudi tujinga bwà twikalakù baalükile mu Èjiipìtù mwàmwa’s. Misùùkà yètù mmikine dyâmpà dyà dipeepèlè edi.” Mu ngaakwìlù mukwàbò, bu mêmè mwà kucyàngata mu mùshindù wà maalu-malonda mpindyewu, ki cìvwàbo bàmba.

<sup>71</sup> Mpindyewu mu ditùkù dyà cyena-leelù edi, ncifwànyìne kwikala ne: “Kaa, dilòlò dyônsò dyà diisâtù, disangisha

dyà milòmbo! Dìndà dyônsò dyà dyàlumingu, kwalukila ku èkèleeziyà! Citùdì tuumvwa ki cinyi's? Cintu ànu cìmwècìmwè aci; muyishi ùjuuka ùyiisha; misambu; kwalukila." Nwamònú's, dîbà adi wêwè's uyààyamù ànu bu bwalu bukwenzeja. Kwêna mukuukwidi to. Mukuukwidi ùyaayamù mbwà kukuukwila, bwà kujikula bidiye naabì kumpàlà kwà Nzambì wendè, bwà kutùmbisha Nzambì bwà bwímpè Bwèndè; ku Dîyì dyônsò, yéyè ùdi ûshààla ànu kacya wàkwàtaKu.

<sup>72</sup> Mbyenzè ànu mùdì bwalu bwà dinanga's. Byôbì ne uvwa useesela nsongààkàjì bwalu udi mumanyè ne mbwalu bukwenzeja, anyì nuseeselangana ne nsongààlùme, paùcìvwà mwâna mutekête apu. "Maman mmuswè bwà mêmè kuseeselangana ne mulùmyànà ewu, kàdi mêmè ncyénà ànu mwà kumutwàlakù to." Kwêna upeta cintu nànsha cìmwe mu kulwa kwèndè bwà kukumònà aku to. Anyì, piìkalàaci mùshindù wùmwèwùmwè awu bwà nsongààkàjì kùdì nsongààlùmè, anyì nsongààlùmè kùdì nsongààkàjì. Paùdì useesela nsongààkàjì, yéyè ûkutonda; maman ngudi muswè bwà ùmuseesèlè bwalu nnsongààkàjì wa mùshindù wùdì maman munangè. Wamònú's, cìdi cikutonda; bwalu bwà dinanga kabuyikù to nànsha bwà kânà. Kàdi wêwè kwêna ubicyükà to, kùyi muswè bwà kudisàmpulula, kùyi muswè kuya kamumònà to. Nènku cìdi... Mòná's, ncintu cibì be. Ne pàdì nsongààlùmè awu ùlwà bwà kukumònà, ekèlekèle, wêwè udi ujinga ànu bwà énze lùkàsà, ààlukilè mwàbò.

<sup>73</sup> Mmùshindù wùmwèwùmwè awu paùdì wamba ne: "Yéyè ùdi ùyiisha mukùngùlù mule nànku bwà cinyì? Kàdi bintàkanyì ebi mbyà cinyi's, ne bikwàbò byônsò?" Nwamònú's, kwêna mu dinanga to.

<sup>74</sup> Kàdi paùdì bulelèlà ànu kacya wâlamata ku Dîyì dyônsò, mwänùpèeshi Nyumà didìmwija mu dìndà emu amu, nwamònú's ne: "Kulamata ku Dîyì dyônsò." Aci ncifwànyìne kwikalà civwàYe ùnwàmbila aci. Kacya ànu wakwàta! M'Mwoyi wà Cyendèlèlè, Dîyì dyônsò dyà Nzambì. Ndisànkà bwà kuya mu èkèleeziyà, nànsha bwalu kaayì bwenzèke. Kwikalè luuyà lukolè, mashìka, bantu bàbèngà kucyükà maalu, nànsha bantu bàkòkangana, bàkungula ne mifuunu, cyônsò cìdìbo bènza aci, cicidi ànu disànkà dyà kuumvwa Dîyì dyà Mukalenge. Dîbà adi udi mu dinanga dîbà adi ne Kilistò, nwamònú's, udi munangè kwikalà kuya mu èkèleeziyà.

<sup>75</sup> "Èè, munanga wanyì, dìndà dyà dyàlumingu ndyèdì dyàlù kàbìdì, ngeela meeji ne bìdi bìkèngela bwà twêtù kwowesha bâna aba mâyì ne kuya kuntwaku. Ekèlekèle, s'mbyà bìcyòkeshangana's!" Wamònú's, kwêna mu dinanga to.

<sup>76</sup> Kàdi wêwè mu dinanga menemene, kwêna ànu mwà kwindila too ne pàdì dìndà dyà dyàlumingu dilwa to, bìkèngela ànu ùyekù naabò kuntwaku. Nènku tudi tupeta, ne bwà kuumuka... Bantu bàà Nzambì, kabèèna bàkutonda to.

Mòna's, bâdi—bâdi mbânà bëètù bâà balùmè ne bâà bakàjì. Mûmvwà ne ciibidilu cyà kwamba ne: "Nudi nudyenza cimuku bu musàbusabu wà Mamvwa à tumbùyi mukwàtàkàne mu dîndà dyà mashika." Kawèna—kawèna wùpòngoloka to, wùdi wùshààla ànu mukwàtàkàne, nudi bamanyè's, ànu ndendende. Mpindyewu, aci's ncyakwidi cikàyàbâle, kâdi cidi—cici—cidi cîteeta bwà kunùmanyisha cîndì muswè kwamba, nudi numònà's. Ikàlaayi baswìkàkàne. Ne pàdiku kùtàmba kwenza mashika, ôwò ùdi ùtàmba kukwàtakana. Nènku mùshindù awu ngùvvwàbi bìkèngela kwikala bwëtù twëtù. Pàdiku kùtàmba kwenza mashika . . .

Pàdì balundà bâà pa buloba bàkulekela,  
Tùngunukà ne kwikala muswìkàkàne Nendè!

<sup>77</sup> Ne cidì cyènza ne twìkalè banangàngànè, muntu ne mukwèndè, kí nnè bwalu tudi kampànda nànscha; kâdi n'Kilistò udi mu muntu ne mukwèndè awu, utùdì tunanga, nudi numònà's. N'Nzambì udi mu buumùntù bwëtù awu, utùdì tunanga. Mpindyewu tutu banangè kudisanga pàmwè. Tuvwa kale wàwa twimba tuyèngà wà kale ewu ne:

Mwonjì wùdì wùswìkakajà  
Myoyi yètù Mu dinanga dyà bwena Kilistò  
wùbeneshiibwè;  
Bwobùmwè bwà meeji a buuwetù  
Mbufwànàngànè ne bwà ku Dyulu. (Nwamònú  
anyì?)

Bwobùmwè bwà meeji à buuwetù  
Mbufwànàngànè ne bwà ku Dyulu.

Kumpàlà kwà Nkwasa wa butùmbi wa Taatù  
wetù,  
Tudi twicikija masambila ètù à kapyà kakolè;  
Diciìnà dyètù, ditèkemena dyètù, twipàcìlà  
twëtù ntwà mwomùmwè,  
Busàmbi bwëtù ne ntàtù yètù.

<sup>78</sup> Nwamònú anyì? Èyowà's, mukalenge! Pàdì umwe mupetè dibènesha, tudi bônsò ne disànkà bwà bwalu abu. Pàdì umwe mubungàme, tudi babungàme pàmwè nendè. Tudi, tudi baswè kwikala bônsò pàmwè. Mpindyewu mùshindù awu ki wutùdì ne cyà kwikala.

<sup>79</sup> Ne mùshindù awu ngùvvwà Izàlèèlè ne cyà kwikala. Kâdi bïkaavwa bilwè bujitu ne: "Kaa, dyâmpà dyà kale dyà dipeepèlè edi, dyâmpà dyà Banjèlo's! Èè, citùdì tuditacishila bwà dyâmpà dyà kale dyà dipeepèlè edi ncinyì? Misùùkà yètù's mmilkine cintàkanyì eci! Ne byônsò's mbibi. Ne—ne manà à kale àdi àmatà bufuku bwônsò aa, mònà's, s'mbipìcìlbwe ne twëtù ne màtungulù à ayì ne pwàrô byà mu Ejiipitù abi." Nudi numònà's, myoyi yàbò kayìvwa milongolola bwà lwendu alu to.

<sup>80</sup> Ne pàdì mulùme anyì mukàjì ùbanga kudyàbakeena bwà diya dyà mu èkèleeziyà, bùmvwa bitàmba kubàtonda bwà diya dyà mu èkèleeziyà, kî mbadilongòlòle bwà lwendu to. Ncyà bushùwà. Kùdi cintu cipampàlámuke mwaba kampànda.

<sup>81</sup> Kaa, paùdi munangè Nzambì, ne wela meeji ne uyààya mu Dyulu, ne nwénù bônsò nuyààya pàmwè:

Bwobùmwè kaayìpu's wè, ndisànkà kaayìpu  
dyà kùdi Nzambi's,  
Mweyémène pa dibòkò dyà kashidi;  
Kaa, nditalala kaayìpu dibènèshiibwe dyà  
kwikala pabwípi menemene ne Mukalenge  
wanyì,  
Mweyémène pa dibòkò Dyèndè dyà kashidi.

Ncinyì... Tutu twimba misambu ayi.

Tudi twabanyangana makèngà ètù àdyàcimwè,  
Twambwishangana majitu ètù àdyàcimwè;  
Ne misangu yàbûngì kùpòngoloka bwà muntu  
ne mukwèndè  
Cinsònji cyà dyumvwilangana dyà luse.

Patùdì tutàpuluka,  
Bìdi bítùpéésha dikènga munda;  
Kàdi netwikalè ànu baswìkàkàne mu mwoyi,  
Ne tutèkemena bwà kutwìlangana cyàkàbìdì  
ku disangisha dyà milòmbò dìdì dilondà.  
(Èyowà's, mukalenge, bacikàle ànu  
baswìkàkàne mu myoyi!)

<sup>82</sup> Mpindyewu ukààdi mudìlongòlòle bwà lwendu, wamònu's, ukààdi mudìlongòlòle bwà kubwela mu Buloba bulaya. Bikondo byà dyediibwa dyà ku diteeta abi, ki mwaba wà njìwù ngwôwò awu; cipeélà, bikondo byà dyediibwa dyà ku mateeta.

<sup>83</sup> Izàlèèlè, mu cikondo cyèndè cyà dyediibwa dyà ku diteeta, wàkadítwa mu ditàndangana ne dikòkangana dyà muntu ne mukwèndè, ne dikìnà dya dyâmpà adi. Ne bààkajinga bwà kwalukila mu Èjiipìtu.

<sup>84</sup> Ne dîbà adi kubangabo kudyàbakeena bwà mulombodi wabò. Kaa, bàvwa bacìina ne nkwpì kwàlwàye kubàpàmbula; paanyimà pàà yéyé mananè kudileeja ne mmulombodi, ne Nzambì mananè kujaadika ne yéyé nguvwa mulombodi. “Èè, pàmwàpa tudi benzèku maalu ne ndambù wa dikolesha dyà maalu. Ne—ne pàmwàpa bakùtùle lwendu, bônsò balondè dikàsà dibi,” anyì, cintu cyà mùshindù awu, nwamònu's, bàvwa mu miyiiki yàbò bààkula bibì bwà Nzambì ne bwà Môsà, Nzambì ne mulombodi Wendè.

<sup>85</sup> Mpindyewu patùdi tukafika mu mùshindù kampànda, wà twamba ne: “Ncyêna mumanyè Dîyì nî ndiswè kwamba Cikampànda, anyì to,” ne: “Mêmè ncyêna mumanyè pa biine bìdì

bitàngilà Nyumà Mwîmpè abi to; ndi ne mpatà ndambù bwà Cyôci aci. Ndi mumanyè ne bakwàbò kabèèna paabu nànku to.” Èè, ndààku mu Èjiipitù’s. Nwamònú anyì?

<sup>86</sup> Kàdi pawìkalà mupàngàdìke bulelèlà bwà kushààla mu njila, shààla ànu ne Mulombodi ewu, Nyumà Mwîmpè, shààla ànu ne Díyì. Nènku wéwè mushààle ne Nyumà, Yéyè neákulamè mu Díyì. Ncyà bushùwà. Yéyè neàye neebè buludì mu njila, kajila kaa Díyì aku. Nènku kwìkadikù Nendè bwôwà nànsha. Yéyè kààkukwenzela bibì mu kantu nànsha kàmwè to, Yéyè neakukwàcishe wéwè mutapike. Yéyè neònđopè mpùtà yônsò, Nyumà Mwîmpè awu.

<sup>87</sup> Mpindiyewu tudi tusangana ne, mu lwendu lwà mu njila ewu, paanyimà pàà bamanè kwikala mùshindù ewu, bààkafika mu mwaba kampàndà wà Holèbà. Nènku H-o-l-è-b-à, Holèba, díbà adi tudi tusangana... Twânjì tûsunsulààyibì dínà adi. Mwaba awu ki wùdì dì—dínà adi *Holèbà* dyùmvwija ne “mwaba mûme” anyì “cipèèlà.”

<sup>88</sup> Nènku patùdì tupàtuka mu bwobùmwè bwà muntu ne mukwèndè mu èkèleeziyà, ne tupàtuka mu bwobùmwè ne Nyumà Mwîmpè, cidi cìkatufikisha mu mwaba wà mûme, mu cipèèlà, kamuyì cintu cidi ne mwoyi to, byônsò ànu ne tubèjì twà mêbà pambidi apu. Nwamònú’s, ci—cipèèlà, katùpà kakesè kàà ntìlu kiikàle ne dyeba adi pambidi. Nukààvwakù bamanye ciinè aci ne ncinyi anyì? Nkabéjì kakesè kanefuke kàà mushinga mukolè kàtù kakàyikù kapetè mâyi to, kàdi ànu kadivùnge bikolè mu mùshindù wà kavwijiibwè kaadyèbà. Nènku paùdi umòna muntu wa mùshindù awu, pàmwäpa mmusùükà wà mushinga mukolè wùvvwàku mufwànyìne kwikala mumyamìnyìlbwe mâyi mu mùshindù mwîmpè, wùvvwàku mufwànyìne kwikala dibèjì dikese dyà dinefukè anyì cintu kampàndà. Kàdi pamutù pàà cyôci aci, nkadivùnge mu mùshindù wà kashààle dyèbà, ànu bwà kwikala kutwa bintu byônsò, nudi bamanyè’s, kwangulangana bilèma. Cintu cìmwèpelè cidiwu wùkèngela cidi ànu mmâyi. Kwàjikì. Cidi cìwùkèngelà cidi ànu di—ditâbuluja, anyì dicìbuluka, dipetulula eyashima dipyadipyà dyà kùdì Mukalenge. Ne—newùvungulukè wòwò mwìnè, bu wêwè ànu mwà kuwùtèèka mwaba wùdì mâyi.

<sup>89</sup> Kàdi, ki mwaba wùdì aba bâdì basòmbèlè mu mwaba awu bìkèngela bâkengè ne ngiikàdilù yà mwìnè mwaba awu awu. Nènku aba bâdì baswè kwikala basòmbèlè mu cyuyùyà cyà mùshindù awu, cyà mwaba wùdì byônsò ànu bitwangana mêbà ne bìkòkangana, ne bìtàndangana ne bìbindulukilangana mùshindù awu, èè, wêwè’s newìkalè ànu musòmbèlè mu cyuyùyà aci’s, kwàjikì. Kàdi kabyèna bìkèngela bwà twétù kusòmbela amu nànsha, kabyèna ne mushinga bwà twétù kushààlamù to.

<sup>90</sup> Mpindiyewu, Holèbà ewu ùvwa mmwaba wàkatekeshiibwà Nzambi mu mabòko kùdì cisàmبا aci, bwalu bàvwa balalàkàne mu mwaba ewu ne bakafikè mu ngiikàdilù ewu. Nènku

Yéyè kubàfikisha buludì mwaba awu, bwalu kabàvwa baswè kwendela mu kajila aku to. Bâàkumuka mu—mu njila munène, bayè mu njila wa ku luseke elu. Ki dîbà adi kufikishaci Nzambì ku dyenza dyà cintu kampànda cìvwà cikwàcishà bwôwà. Yéyè... Kufikishaci Nzambì ku dyambila Môsà bwà kwangatayè dikombo dyà cilumbulwidi dyàkàlumbulwishàye naadi ditùnga adi adi, ne kutuuta Lubwebwe, bwà kupàtulalù mâyi.

<sup>91</sup> Mpindyewu, kùdi dileesònà dilenga be mwab'ewu twêtù ànu mwà kucyùmvwa, nwamònù's. Nènku bwalu tudi tutàmba kupàtuka mu cìncyòmpancyòmpa, ne mu myonjì yà maalu à buloba, ne bikwàbò, cyàkafikisha Nzambì ku dyangata manyooka à bàà pa buloba ne kutuuta naawù Mwan'Èndè Sungasunga, ku Kàlvaryò, bwà twamònà mwà kuya badishikàmine. Nudi bumvwè cìndì muswè kwamba aci anyì?

<sup>92</sup> Mpindyewu, bwà kufikisha bantu aba ku mâyi kampànda, paanyimà pàà bamanè kufika kuntwaku, mwaba mûme ewu wàkavwijiibwa Kàlvaryò. Ki mwaba awu Nzambì kwambila Yè Môsà, Yéyè ne: "Angàtà dikombo adi ne bakùlù, ne ndàayì, nènku Mêmè nêngìimanè pa Lubwebwe kumpàlà kwèbè aku." Nènku Lubwebwe elu lùvwa n'Kilistò. Ki Môsà, ne dikombo dìvwàye mutwàle naadì cilumbulwidi pa ditùngà dyà Izálèèla adi, kwangatayè dyôdì dikombo dìmwèdìmwè edi e kutuutayè manyooka à Nzambì pa Lubwebwe alu. Nwamònù anyì? Wàkangata mpèkaatù yà bantu kuyèèla pa dikombo edi. Pààbì, bìvwa bikèngela bwà yéyè kwikalà mutuutè cisàmbà. Pamutù pàà kutuuta cisàmbà, yéyè kutuuta Lubwebwe. Ki Lubwebwe, ku cyenzedi cyà Nzambì, kutwàlalù lupàndu, kutwàdilalù cisàmbà cìvwà cyàmba kubùtuka aci mâyi. Kutwàdilalù cisàmbà cìvwà cìpùnga ne lufù aci mwoyi. Nènku ki cyàkenzà Nzambì pa kwangata kwà kaadikombo Kèndè—Kèndè kàà bulombodi kàà cilumbulwidi aku, ne kujìngila mpèkaatù yànyì ne mpèkaatu yèbè ku dikombo edi; pààbì's bìvwa bikèngela kwikaladì ditütututè twêtù, kàdi dyákatuuta Kilistò; bwà mu Yéyè kupàtukamù mâyi, àdì ûmvwijà "Nyumà," Nyumà Mwîmpè wàkapàtuka munda Mwèndè, bwà kutùpèèsha Mwoyi. Mpindyewu tudi ne Mwoyi wà Cyendèlèèlè. Mpindyewu, Lubwebwe alu lùvwa n'Kilistò. Mpindyewu tudi baswè kumònà.

<sup>93</sup> Mêmè nkààdi mumònèmònè mishindù yàbûngì yà mazòlì à Lubwebwe elu à mu meeji à mu mitù. Ngâkamònà dìmwè dyà à matàmbe kudyudiibwa, àbìdì àdi pansiì aa, too ne mu mwaba ùvwa kaa—kaalubwebwe kakesè kasanganyiibwa ku lusongo Iwà kakùnà kampànda. Nènku—nènku Môsà ùvwa ne cyà kwikalà mutuutà lubwebwe elu, ne Izálèèla ùvwa kwinshì aku ne dikopo dyà cyayì, bàpetela cyàkunwà ku kasùlù kakesè kàvvà kàmata kàpàtuka mu kiinè kaalubwebwe aka. Mpindyewu aci's cìdi ànu mmwènenu wa muntu kampànda.

<sup>94</sup> Kàdi pààkapàtulà Lubwebwe elu mâyì Àlù awu, kùvvwa bantu bapité pa mìliyò yìbìdì, pa kuumusha ngombe, tuumeelù, ne bikwàbò byônsò byàkanwìnà mu bimbaafù byà mâyì byàkapàtukàMu. Cìvwa mmusùlù wà wùfùkuka wùpàtuka muntwamu!

<sup>95</sup> Mùshindù awu ki wùdibo bâeteeta kuvwija Kilistò, Nyumà Mwîmpè leelù ewu. “Cìdi ànu dimyamina dikesè.” Nwamònou’s, ànu kakùmbànè bwà kukufikisha ku kwitabuuja ne kùdi Nzambì kampànda. To.

<sup>96</sup> M’Mâyì à àbòdyodyoka! Davìdì wàkamba ne: “Lupànzà Iwànyì lùdi lùyiila ne pansi!” Cìdi ànu ciinà cìdì cítùnkumuka ne Nyumà Mwîmpè.

<sup>97</sup> Bantu bâdi bàMucìina. Bàmwè bantu bâtu bàmba ne: “Èè, mêmè ndi ànu ndambù ne bwôwà bwà ne nêngéñè cikampànda anyì cikansanga, anyì byôbì byenzèke ne ntambè kuya ndambù mu ndòndò. Ndi mwà kunùleeja muntu kampànda wâkatàmba kuya kule ndambù.” Kàdi wêwè kacya kütukù mwanji kufunkuna kùdi ewu utukù kàyi muyè kule byà bikùmbànè awu to. Nwamònou anyì? Eyowà’s, udi wamba bìshi bwà aba bâtù kabàyikù bayè kule byà bikùmbànè abu?

<sup>98</sup> Mpindyewu, tukààdikù bapetè bantu bààkabwelà mu musunya, kàdi kujuukila ku dikàsà dibì. Nènku—nènku kaciìyì Nzambì to, kàdi bantu mbàdì ne... Bwà dipanga dyà bulombodi bwîmpè, ne bikwàbò, babàjuudile ku dikàsà dibì, ne kubwelabò mu dikolesha dyà maalu. Ne pashìshe buloba bujimà, dyabùlù ùbàfunkwina ne: “Mònaayi cyàcya! Mònaayi cyàcya!”

<sup>99</sup> Èè, lekèlaayi mêmè ngììmanè mu dìndà emu mfunkunè paanyimà kùdi bakwàbò bavudija ku mìliyò bàvvàku kabàyi nànsha babange to. Kàdi bishi bwà bôbò abu? Nwamònou’s, tàngilààyi wabò ngiikàdilù. Tàngilààyi muntu bu mùdì Eichmann leelù ewu, mwikàle ne bitàmbe kutùmbuka... Bâdi bàmba ne: “Beena Mpenta mbapangè nsòmbelu wa bukàlàngà ne mbàà ngaakwilù mukayàbàle, ne kí mbalongè túlaasà to,” ne bikwàbò byà mùshindù awu. Tàngilààyi Eichmann, umwe wa ku bantu bàà balongè túlaasà tutàmba kutùmbuka pa buloba. Kàdi wàkashebeya, mìliyò yìsambòmbò yà bânà ne bantu bakàjì ne bantu balùme, mìliyò yìsambòmbò yà misùkà. Kwêna muswè kufunkuna kùdi muntu wa mùshindù awu to.

<sup>100</sup> Kàdi kaamuntu kakesè kèvvàku kakàyi kamanyè kubala to, bikàkolèle, pàmwàpa kàtèèla bibì dínà kampàndà dyà mu Bible, ne, anyì pàmwàpa mwenzè cintu kampànda anyì mwenzè cintu cibi kampànda, anyì mwenzè cilèma kampànda, bibèjibeji mbiswè kucifundà mu myaba yônsò, kwamba ne: “Kabyèna bikèngela bwà kubèyemena to.”

<sup>101</sup> Dibà adi pììkalà aci kaciìyì mwà kweyemenyiibwa to, bwà cinyì kanùyikù nwamba dilonga dyà túlaasà, bintu ne mamanya à mu mitù bìdibo naabì leelù ewu ebi? Tàngilààyi Adolphe Hitler.

Tàngilààyi mitù yà meeji yà pa buloba leelù ewu. Bâtàngilaayi. Kasúmwinù kàà kale aka kàà ne: "Kubala umwe nkudibala."

<sup>102</sup> Cintu cìdì cikèngela wêwè kwenza nkwikala mukùmbànè, ku Nyumà Mwímpè, bwà kusunguluja cìdì címpè ne cìdì cibì, ne kwangata cìdì címpè ne cìdì cibi.

<sup>103</sup> Mpindyewu, tudi tusangana ne Kàlvariòyò kààkapetàbo bôbò aka, kàdi mâyì à mwoyi's àkafùkuka bwà cisàmbà.

<sup>104</sup> Mpindyewu, bàmwè bantu batu bâdyàmbidila mu myoyi yàbò ne mu meeji àbò ne, Izàlèèlè mujimà bâàkanwà, ne pashìishe bâàkangata tuumeelù ne bâàkaswìka majitu àbò pa tubalù twàbò, ne bikwàbò, ne bâàkangata bânà bâàbò balela ne bâàkenza lwendu e kubwela mu mwaba kampànda mukwàbò, ne bâàkashiya Lubwebwe alu mwaba awu, lùmacisha tuumamata twà mâyì. Aci's mmafi.

<sup>105</sup> Lubwebwe alu lùvwa lwenda lùbàlonda, ne mâyì awu àvvwa ènda àbàlonda. Mpindyewu mu Kolintò wa Kumpàla, nshapità wa 10, ngeela meeji, ku mvensà wa 11, nudi mwà kucipeta, ne: "Lubwebwe alu lùvwa lwènda lùlonda Izàlèèlè." Kwônsò kwàkayàbo kubangila ànu ku ditükù adi aku, Lubwebwe alu lwakaya naabò, ne mâyì àkabàlonda.

<sup>106</sup> Cimfwànyì cilenga kaayìpu's wè, ne ci—cikwàcilu cilenga ne lwongò bwà mwena kwitabuuja leelù ewu, udi mumanyè ne Lubwebwe lwàkatuuiciibwà musangu kampànda alu, Mâyì àkапòngolokà ku Kàlvariòyò musangu kampànda awu, àyaaya neetù kwônsò kutùdì tusanganyiibwa aku. Kaa, ekèlekèle! Kî nkwalukila ku mwaba kampànda, ne kwamba ne: "Èè, tuvvà bapetè cyà bushùwà Mâyì dyàbwàbwa adi, kuntwaku" to. Tudi ne Mâyì leelù ewu, mwab'ewu mene, bwalu Lubwebwe alu lùvwa n'Kilistò! Ne Kilistò ùdi umwèumwè awu makèèlèlè, leelù, too ne kashidi.

<sup>107</sup> Nwamònù's, Lubwebwe alu lùvwa lwènda lùlonda Izàlèèlè. Kî mbôbò bâvvà bènda bâlonda Lubwebwe alu to, kàdi Lubwebwe alu ndùvvà lwènda lùbàlonda bôbò. Amen. Beena Izàlèèlè bâàkatùngunuka ne lwendu lwàbò. Bâvwa ne cintu cyà dyenza ànu címwépelè, ncyà ne, kulama ànu njila mululàme, buludì too ne mu buloba bulaya. Ne Lubwebwe alu ne mâyì bìvwa byènda bìbàlonda.

...Lubwebwe lwenda lùbàlonda bôbò:...

Kolintò wa Kumpàla ngudi unwàmbila nànku awu, nshapità wa 10. Èyo.

...Lubwebwe alu lùvwa n'Kilistò.

<sup>108</sup> Nzambì wàkangata manyooka à bantu ne wàkaàtèèka pa Kilistò, ne wàkaMutuuta. Nukààvvakù bamòne ne, kùvwa mutanta mu Lubwebwe alu, kubangila ànu apu anyì? Lubwebwe lwàkapeta mutanta, mwaba wàkatuutà Môsà awu. Ne Kilistò wàkapeta mutanta, pààkatuuciibwà Ye apu: "Wàkatàpiibwa

mpùtà bwà dishipa dyètù dyà mikenji, ne ku mibündàbündà Yèndè twâkondopiibwa.” Ku Mwoyi awu kupàtukakù Mâyì a Mwoyi atùdì tusànkila leelù ewu aa!

<sup>109</sup> Mpindyewu, bwà kupeta Mwoyi ewu, vùlukààyi ne, Mwoyi wà Kilistò wùdi wùshààla ne Èkèleeziyà. Àlèluuyà! Kaa, twîkalapù mwà kwelesha meeji ètù lwongò mwaba awu bwà tusunsa dikùmì tûdì tûlondà etu's wè! Kilistò kêna ûshiyà Èkèleeziyà to. “Mêmè nêngììkalè neenù misangu yônsò, too ne ku ndekeelu kwà buloba.” Bantu bôbò mbàdi bàshiyà Kilistò, kî n’Kilistò udi ushiyà bantu to. Bantu bôbò mbàdi bàMushiyà, ku bupidyà bwàbò. Bôbò mbàdì bashiyà Kilistò, kî n’Kilistò udi ushiyà bantu to.

<sup>110</sup> Izàlèèlà ngwàkuumuka ku musùlù, kî mmusùlù wàkuumukà kùdì Izàlèèlà to. Nwamònú anyì? Bwalu, Bible ùdi wàmba bitòòke tòò ne: “Lubwebwe ne mâyì bìvwa byènda bilonda Izàlèèlà.” Bìbàlonda bôbò! Kwônsò kùvwàbò bàya aku, Lwòlù pààlù, nkùvvàlù lùya.

<sup>111</sup> Kaa, ndi muswè, mu dìndà emu, bu ne tùvwa ne dîbà, bwà kubuulula mu nshapità 1 wa Yoshùwà, mùdìYe mwambè ne: “Mwaba wônsò wùdi bidyacilu byà makàsà èbè bidyata awu, Ngààkupèèshiwù. Kwônsò kûyaayà, Mukalenge Nzambì webè ùdi neebè. Kuciìnyikù muntu nànsha umwe to. Ikàlà ne bukìtù! Mwaba wônsò mene wûdi udyata dikàsà awu, Mêmè ndi neebè mwaba awu mene, nànsha piikàle penyì.” Nzambì wènda ùya ne Yoshùwà!

<sup>112</sup> Nzambì umwèumwè awu ùdi ùya ne Èkèleeziyà Wendè mu dîndà emu. Tùnwinààyi ku Mpokolo ewu kuntu kwàka. Mwaba wônsò wûdi udyata dikàsà, ki wîkalà Nzambì neebè mene, bwà kukupeesha mâyì ne kukupèèsha Mwoyi. “Nêngììkalè neebè misangu yônsò, too ne ku ndekeelu kwà cikondo.” Kilistò umwèumwè awu makèèlèlà, leelù, too ne kashidi. Mikenji yà Nzambì.

<sup>113</sup> Mpindyewu wêwè udi wamba ne: “Dîbà adi, Mwanèètù Branham, bwà cinyì bìdi ne twêtù katwèna twenza bintu bìvvà bikèngelà twêtù kwenza? Mmunyì mùdìbi ne mapà ètù ne bikwàbò mu èkèleeziyà kabyèna bikafikakù ku ditanta dyàwù, ku mwaba wùvvà wùkèngelà kwikalabì? Mmunyì mùdìbi ne èkèleeziyà wetù kêna ùbàndakù mu cipidì cìvvà cikèngelà kwikalayè?” Bantu, mu cikondo cyà dyediibwa ku diteeta, bâdi bâteketagana ànu mwàkenzà Izàlèèlà amu. Bâdi bëèla meeji ne Nzambì mmubàshiyà.

<sup>114</sup> Kâdi, vùlukààyi ne, Lubwebwe alu kacya kalwàkashiyakù Izàlèèlà to. Izàlèèlà ngwàkashiya Lubwebwe, wàkapwà mwoyi ne Lubwebwe alu lùvwa naabò dîbà dyônsò. Lùvwa ànu mwaba awu, Iwàkaya buludi naabò too ne ku ndekeelu kwà njila. “Lùvwa lwènda lùbàlonda.” Kalùvwa ntàntà mule kupita mwaba ùvwa dîyì dîfika to. Kalùvwa ntàntà mule kupita mwaba

ùvwa dîyì dyumvwika to. Anyì, kalùvwa ntàntà mule kupìta mwaba ùvwa mèṣù mwà kumònà to.

<sup>115</sup> Nànscha Kilistò pèndè! Ne Èkèleeziyà leelù ewu, Yéyè kêna ntàntà mule kupìta mwaba ùdi dîyì dìfika to. Bàmwè bàà kunùdì mbatwè címpingà, ne benzè cídì cibì, ne nudi bajimije disàンka adi, ne Mâyi ènù mmakàme. Yéyè úcidi ànu neenù mu ntàntà wa dîyì dìfika awu. Ùdi wènda ùnùlonda. Yéyè mmumanyè dinyungakana dyônsò dinùdì nwenza ne byônsò binùdì nwenza abi's. Ùdi újinga bwà kukuumvwakù uMubiìkila bwà àamatè mu cyalu.

<sup>116</sup> Nènku nkawaka munène wa cyena-mpenta leelù ewu ewu. Nzambì mmwindile bwà nùMubiìkilè bwà àamatè mu cyalu. Kanwèna Nendè ntàntà mule kupìta mwaba ùdì dîyì difika to. Nànscha byôbì ne tudi benzè bibì, ne benzè mpèkaatù, ne baMukomè nyimà, ne—ne benzè bintu bìvvà kabiyi bìkèngela twêtù kwenza to, kàdi nànscha nànkú Yéyè ùdi neetù. Kilistò wàkamba ne Neìkalè neetù.

<sup>117</sup> Bible mmwambè ne: “Mâyi àvwa ènda àlonda bânà bàà Izàlèèlè.” Pàvvàbo bùmvwa nyòòtà, bàvwa bamanyè ne mâyì àvwa pabwîpì apu.

<sup>118</sup> Mpindyewu, bintu ebi mbikòntonona kùdì mikenji kampànda. Ndongolwelu wa Nzambì yônsò mmutèèka kùdì mikenji kampànda. Mpindyewu netwàngatè...Twǎnjààyi kwimana kakesè.

<sup>119</sup> Twàngatààyi buloba. Bùdi bùnyùnguluka, mu mèbà ônsò makùmi àbìdì ne ànaayi bùdì bwènza dinyùnguluka mu kaabujimà, bipwàngànè menemene, mu mùshindù wà ne... Kacya twêtù katütukù banjì kukùmbana, ne maalu ètu ônsò à mamanya awu, bwà kwenza dîbà dyà ku dibòko dìdì mwà kulama dîbà dipwàngànè to. Ku musangu ne ku musangu, mèbà à matàmbe bwîmpè àkaadìbokù benzè awu, munda mwà cidimu címwè, neàpicishè anyì neàshaadilè pashiìshe ne tusunsa twàbûngì. Kàdi kacya buloba kabütukù bùpangila to bütù bùfika ànu pa dîbà jaaajaaja. Mbupwàngànè menemene mu mùshindù wà ne beena maalu à mamanya leelù ewu, balungi bàà maalu à mabùlùngà bàdi mwà kukwambila, mu bidimu makùmi àbìdì kuumukila ku mpindyewu anyì bidimu makùmi àtaanu kuumukila ku mpindyewu, ànu menemene mwàpítanganà dîbà ne ngondo. Pàdìbu bùnyùnguluka musangu wàbù wà mèbà makùmi àbìdì ne ànaayi, ne bùnyùnguluka cikondo cyàbù cyà kunyùngulukila cijèngù aci bwà muvù kampànda, kabwèna bupangila kantu nànscha kàmwè to. Àlèluuyàh! Mbupwàngànè, bwalu bùdi bùnyùnguluka bilondèshìle mukenji wà Nzambì.

<sup>120</sup> Mbamanyè ànu menemene ne ndîbà kaayì dyàbàndà mâyì à mbû, ànu ku kasunsa kônsò, bwalu mbamanyè dîbà dyàya ngondo ku cibanda. Ne Nzambì mmutèèke byônsò abi mu bulongàmè ku mukenji kampànda. Nè pàdì ngondo awu ùya

ku cibanda, dibàndà ne dipweka dyà mâyì à mbû diyaaya nendè. Pàdi ngondo awu ùbàla, s'ki dibàndà dyà mâyì à mbû dilwalwà nendè edi. Ne bôbò mbamanyè menemene, ku dipima dyà dîbà, dîbà dìikalà ngondo mwà kuya ku cibanda. Bâdi mwà kucifunda mu kabala-matùkù bidimu kumpàla, ne kukwambila, ànu mu byôbì menemene, pààbanga mâyì à mbû awu kupweka. Bushùwà, bwalu mùshindù awu ngùdi ngondo ùpàtuka, bwalu mmutèèka mu bulongàmè bwà mukenji wà Nzambì.

<sup>121</sup> Mvwa mwimàne, ditùkù adi, pabwìpì ne Dijiba dyà Michigan. Ki mêmè kuya ku Dijiba Ditùmbùke, pàmvwà mu njila mutàngile ku Canada, mushiki munènè wà mâyì awu. Ki mêmè kwimana mwaba awu, ne kudyàmbidila ne: “Nntàntà wa kilòmèètà bûngì kaayì wa disabuka buludì mushiki munènè wà mâyì ewu kaaba aka!” Ki pashìlshe pângààkasabukà Mich-... anyi Dijiba Ditùmbùke adi, ngâkabwela mu Michigan, mushiki wà mâyì wàmba kwikala bunènè bùmwèbùmwè abu. Nènku kwôkò aku, kuumukila ku Dijiba Ditùmbùke too ne ku Dijiba dyà Michigan, kuumukila ku Dijiba dyà Michigan too ne ku Dijiba dyà Ontario, ne ànu...ne ku Huron, ne majiba ônsò masanga ntete. Mmiliyaalà bûngì kaayì kuvudija ku miliyaalà kuvudija ku miliyaalà, ne ntuku bûngì kabùyi kubala bwà mâyì à cyashima àvwà àsanganyiibwà mu dijiba adi's wè!

<sup>122</sup> Kàdi pààbì mu Nevada, ne mu Arizona mwàmwa, mu Nouveau Mexique, mu California wa ku Esète, mùdi mùsanganyiibwa hectares ne hectares yà buloba bûme cyoneyonci, bwàmba kwoshika. Mbwà bufukè menemene mu mùshindù wà ne, bu mâyì awu mwà kufikakù mu buloba abu, ditunga edi's dìvvwa difwànyìne kudiìsha buloba bujimà, kakùyi mutu nànsha umwe wa úfwa ne nzala to, ne kupeta ne byà pamutù byà kwimansha mu mbû. Aci's ncýà bushùwà! Milìyô ne milìyô yà hectares yìvwà mifwànyìne kupertula milìyô yà binunu byà kîlô byà bìlùngà byà mpàtatà ne byà mbokà, ne—ne byà nkundè ne byà sàlâdè, ne byà radix ne sèlèrì, ne byà konkombre, ne bikwàbò. Buloba's bùvwa bufwànyìne kubítòlwesha, bùdi—bùdi bùjinga ànu mâyì awu.

<sup>123</sup> Kàdi ki mâyì ngôwò aa *apa*, ne ki buloba mbwôbò ebu lwà kwinshi *eku*. Mpindyewu tudi mwà kucìmòna, ne tudi bamanyè ne ncifwànyìne kucyènza, bwalu tudi mwà kuteeta mâyì ní àdi ne cyashima, ne kuteeta buloba ní bùdi ne bufukè. Mpindyewu, dijinga dyônsò ditùdì mwà kwikala naadì adi, kadyàdyàkubítèèkakù byônsò pàmwè to. Kàdi, kùdi mukenji kampànda, ne mukenji awu ngwà dikòkiibwa dyà kùdi buloba. Mpindyewu, bu twêtù mwà kukwata mudimu bilondèshile dikòkiibwa dyà kùdi buloba, tudi bafwànyìne kumyamina mâyì ku katùpà ne katùpà kônsò kàà buloba abu, twangata mâyì à mu majiba bwà kubùmyamina. Kàdi nebikengelè bwà twêtù kukwata mudimu bilondèshile mukenji wà dikòkiibwa dyà kùdi buloba. Katwèna mwà kuàpàtula ku dijinga to. Katwèna

mwà kuàpàtula ku dyela dyà mbìlà mikolè to. Katwèna mwà kuàpàtula ku dituuta dyà mikòbolo to. Bìkèngela tükwatè mudimu bilondèshile mikenji yà dikòkiibwa dyà kùdi buloba, bwà kuàfikishakù. Nzambì ùdi ûtèeka byônsò mu mukenji.

<sup>124</sup> Apa, mvwa ngeela meeji, ncyêna mumanyè ní nkààdikù munwàmbile cyôcì eci, anyì ncitu munwàmbilecì. Mvwa nsanganyiibwa mu Kentucky mwàmwa, ngenza bulembi bwà nshindi, ne Mwanèètù Wood, kùkaadi bu cidimu cijimà nànku awu. Ki twétù... Nshindi yivwa bu yìvvà yìmwèka ne lutatù, ne pa nànku twétù kuya kumbèlù kwà muntu kampànda, bwà kakonka ní tuvwa mwà kulemba. Muntu kampàndà ùvwa ne hectares yàbûngì yà buloba, ne mu buloba bwèndè amu mùvwa meetu àbûngì. Kàdi Mwanèètù Wood kungambilayè, ne: "Muntu awu mmwena dyàbùlù. Yéyè—yéyè mmwena bupidyà." Ki kwambayè ne ùvwa mumumanyè, ki yéyè... anyì ne tatwèndè ùvwa mumumanyè, ùvwa muswè kuyakù bwà kumulomba ní tuvwakù mwà kupeta dyanyisha dyà kutwà buluwà.

<sup>125</sup> Twétù kwendesha kàshinyì too ne kumbèlù kwà muntu awu. Nènku yéyè ne muntu mukwàbò, bônsò bàbìdì ne bidimu makùmì mwandamutekête ne byà munjila, bàvwa basòmbe mwinshi mwà mucì wà pomè. Ki Mukalenge Wood kuyayè kùdi muntu ewu, ne kumwambilayè ne: "Ndikù mwà kutwà buluwà ndambù mu mwaba wèbe ewu anyì?" Ki awu ne: "Èè," yéyè ne, "èyo." Yéyè ne: "Wêwè udi Wood kaayi's? Udi mwânà wa Jim Wood anyì?"

Yéyè ne: "Eyowà."

<sup>126</sup> Awu ne: "Èè, mukùlumpè Jim ùvwa muntu wa meeji matòòke, ne bikwàbò." Yéyè ne: "Udi mwà kutwà buluwà mwaba wônsò wûdì muswè, mu mwaba wànyì emu. Ndi ne nkàmà yà hectares bûngiyi mwab'ewu, enzà mûdì mumòne. Pwekà mu bibandabanda byàbya, kwônsò kuwàswà aku. Üdyümvwè ànu kwènù kumbèlù."

<sup>127</sup> Mêmè mvwa musòmbe mu kàshinyì amu, bwalu mvwa ndyàmbidila ne muysihi ne mwena dyabùlù kabàvwa bafwànyìne kupetangana to, muvwàbi ne tuvwa tukalòmba dyanyisha kùdi mwena dyabùlù.

<sup>128</sup> Ki pashìishe paanyimà pàà katancì, Mwanèètù Wood kwambayè ne: "Èè, mpiindyewu, ndikù mwà kuya ne mpaasàtà wanyì anyì? Ngeela meeji ne mbifwànyìne kwikala bîmpè bwà kulwayè pèndè."

<sup>129</sup> Ki mukùlakajì ewu kukùdimukilayè pa mukombo wèndè awu, kwambayè ne: "Wood, udi uswa kungambilà ne udi mushààle wa ciipanshì menemene, mu mùshindù wà bìkèngela bwà wìkalè wenda ne muysihi kwônsò kûyaayà anyì?"

<sup>130</sup> Ki pa nànku, mêmè kudyàmbidila, paanyimà pàà cyôcì aci ne, bìvwa bîmpè bwà mpatukè mu kàshinyì amu. Ki mêmè kupàtuka mu kàshinyì amu, ne kuyikilanganakù

ndambù mukese wa dîbà ne mukùlumpè mukàlàngà awu. Ki kungambilayè ne lükàsà lwônsò mùvvwâye kâyi bwalu ne bayiishi, bwalu ùvwa wèla meeji ne bôbò bàvwa bàmba cintu kampàndà cìvwàbo kabàyi bamanyè kantu nànsha kàmwè to.

<sup>131</sup> Yéyè ne: “Bàdi ànu bàlàbakana bàmba bintu kampànda bîdibo kabàyi bamanyè ne mbinganyì to. Èè,” mwàkambayè, “pâdi muntu wàkula naanyì, ntu muswè ikalè mumanyè bîdiye wàmba abi.” Mpindyewu, aci’s cidi cyùmvwika címpè. Aci cidi cyùmvwika címpè. Yéyè ne: “Mpindyewu, muntu yéyè wàkula naanyì, ncìtu muswè bwà kwakulayè pa cintu kampànda, cikwàbò, didicinkila pa cintu cìdiye kayi mumanyèpu cintu nànsha cimwè to. Ndi muswè bwà àmbè cintu kampànda cìdiye mumanyèpu cìdiye wàmba.” Èè, mêmè kutwà aci mushinga. Mêmè kuneemeka aci mu mukùlumpè mukàlàngà awu.

<sup>132</sup> Ki mêmè kwamba ne: “Èè, mu bushùwà bwa bwalu, awu’s mmuntu ne muntu ne wendè mmwènenu sungasunga.”

<sup>133</sup> Ki yéyè ne: “Kwàkalwa muyiishi kampànda mûneemu mu musòkò ewu, kùkaadi ndambù wa bidimu, uvwa mwenzè masangisha ku Acton kwàka.” Ki yéyè ne: “Muyiishi awu, dilòòlò kampànda, mwikàle mwenyi mu musòkò amu, kwambilayè inábànzà ka—kampànda uvwa musòmbe mu batèèleji amu ne: ‘Wêwè udi ne müşwalà mu mpaayà mwèbè amu. Ne udi Màndàmù *Kampànda*. Ne wêwè udi ne mwanèènù wa bakàjì udi usaama pa kakúnà apa. Dînà dyèndè n’*Kampànda*. Ùdi munkaci mwà kupùnga ne lufù, ne kànsérè mu cifù.’ Ki yéyè ne: ‘Angàtà müşwalà awu ùkawùtentèkè pambidi pàà mwanèènù wa bakàjì awu, ùmwambilè ne: ‘EMU MMÙDÌ MUKALENGE WÀMBA, kààkufwà to, kàdi neìkalè ne mwoyi.’”

<sup>134</sup> Yéyè ne: “Mukàjì umwèumwè awu ùvwa mulundà wetù.” Ki yéyè ne: “Twêtù kwangata mukàjì awu...Mùshwalà awu; anyì muntu mulùme awu, kùdì yéyè muntu awu.” Kumpàla yéyè ne: “Mukàjì awu, mêmè ne mukàjàànyì tuvwa kuntwaku mu dîndà adi ne bangàte, babèèje mukàjì awu. Kàdi ùvwa bibì byà dikèma! Bangàngàbukà bàvwa bamulekèle, kùkaavwa ntàntà. Ùvwa bibì menemene mu müşhindù wà ne bïkaavwa bïkèngela bwà kwikalà kumutentemwina mu cilàmbà cyà kudibwikila, tumutùntumuna bwà kumutèèka pa pô, kumwaluwa. Kumukùdimwina mu cilàmbà cyà kudibwikila amu, yéyè ùvwa bibì byà dikèma.” Yéyè ne: “Dilòòlò kampànda, kuntwaku, kulwakù mutooyi kampàndà bu ne muntu kampànda uvwa mufwe.”

<sup>135</sup> Ùvwa m’Ben awu kuntwaku, ne müşwalà awu, muyè naawù kuntwaku. Ngeela meeji ne ùvwa ngwèwè, kî mmwòmò anyì, Ben? [Mwanèètù Ben Bryant ùdi wàmба ne: “Amen. Amen.”—Muf.] Ùvwa m’Mwanèètù Ben kuntwaku, muyè ne müşwalà awu, bwalu yéyè nguvwa muyè ne mukàjì awu kuntwaku.

<sup>136</sup> Ki yéyè ne: “Pààkacyàbu mu dìndà, ùkaavwa ùdfa mâmpà makàlanga meela pomè.” Ki yéyè ne: “Yéyè kéné wènza ànu mudimu wèndè sungasunga to, kàdi ùdi wènza ne mudimu wa mwena mutumba. Üvwa musàngàle ànu byètù byà menemene ebi!” Yéyè ne: “Mpindyewu mêmè ntu mudyélèle nkonko misangu yàbûngì. Mêmè ànu mumòne muyishi awu, yéyè awu ùvwa mumanyè bìvvàye wàmba,” yéyè ne, “ndi—ndi muswè ngâyi kilanganakù nendè.”

<sup>137</sup> Mwanèètù Wood kuntàpayè dísù, ne mêmè kumutàpa dísù. Biimàne mwab’awu, ne manyaanù, ne bakòpàkànè ne bukooyà, bâse bitùùdilu mu meetù amu, ne—ne mashì à nshìndì pambidi pèètù pajimà. Pa nànku ki mêmè ne: “Èè,” mêmè ne, “ùdi . . . Udi uswa kwamba ne udi mufwànyìne kwakula ne muntu awu ne yéyè mufwànyìne kukwambila mùvvàye mucyènzè anyì?”

Yéyè ne: “Èyowà’s, mukalenge, s’ki cîndì muswè kwamba.”

Mêmè ne: “Èè, aci’s—aci’s ncintu cîmpè.”

<sup>138</sup> Mvwa munkaci mwà kudyà cìmwè cyà ku bimuma byèndè byà pomè abi. Tuumangìlùngà tukesè twà kale twà kâlaabi atu tùvwa twìkilapù, nudi bamanyè’s, mu muvù wà cidimu wà mabèjì àpòòpoka awu, mu ngondo wa mwandamukùlù. Pa nànku mvwa ne cimuma cikesè cyà pomè aci, ne nkààvwa mucitwe ménù. Ki mêmè kwamba ne: “Ncimuma cyà pomè cîmpè cyà dikèma’s.” Mêmè ne: “Mucì mwinè wàwa wùdi mwaba wàwa kùkaadi ntàntà bule kaayì?”

<sup>139</sup> “Kaa,” mwàkambahye, “ndi mukùne mucì wàwa, kùkaadi bidimu makùmi àsàtù anyì makùmi ànaayi, anyì cintu kampànda.”

<sup>140</sup> “Èyowà’s, mukalenge.” Mêmè ne: “Ndi njinga ànu kukwelakù lukonko cyanàànà.” Mêmè ne: “Nànsha twamba mwinè mmunyì . . . Ndi mmònà ne bimuma byà pomè byàbyà mbimatè ku mucì wàwa, ne mabèjì àwù munkaci mwà kupòòpoka, pèètù bacikàle ànu munkaci mwà ngondo wa mwandamukùlù.” Ki mêmè ne: “Katwèna nànsha bapetè cikondo cyà citaleela, katwèna nànsha bapetè mashikà makolè anyì nî ncinyì to, kàdi nànsha nànku mabèjì awu ngwôwù awu àpòòpoka ku mucì kwàka. Mbwà cinyì nànku awu?”

Yéyè ne: “Mâyì a mu mucì awu mmuumùke mu mucì.”

“Kaa,” mêmè ne, “mmayè penyì?”

Yéyè ne: “Mmapwekè mu miji.”

Ki mêmè ne: “Dîbà adi neàshaalèmu too ne dîbà kaayì?”

Yéyè ne: “Too ne ku muvù wà bintu bítòloka.”

<sup>141</sup> Ki mêmè ne: “Dîbà adi ne àbandè àpinganè, àkutwàdila mabèjì mapyamàpyà bwà dilèji, ne bimuma byà pomè bipyabìpyà byà kudyà’s.”

Yéyè ne: “Ncyà bushùwà. Cyà bushùwà menemene.”

<sup>142</sup> Mêmè ne: “Èè, ndi muswè nkukonkèku cintu kampànda, mukalenge. Wêwè udi wakula bwà bantu bàdì kabàyi bamanyè cìdìbo bàmba abu’s.” Mêmè ne: “Udikù mwà kungumvwija ne m’Meeji kaayì àdì ènza ne mâyì à mu mucì awu àshiyè mucì awu anyì? Ówò mashààlemù mu muvù wa mashìka, mucì awu mmufwànyìne kufwà. Wêwè’s udi mu fwànyinè kushipa mucì awu. Mütôlokù wà mwoyì wùdi mu mâyì à mu mucì awu.” Ki mêmè ne: “Ncifwànyìne kushipa mucì awu. M’Meeji kaayì àdì ènza ne mâyì à mu mucì awu àpatukè mu mucì amu, àkabwelè mu miji, ne àshaalèmu too ne mu muvù wà bintu bitòloka, ne pashìishe àbandè cyàkàbìdi ne àtwalè bikwàbò bimuma byà pomè?” Mêmè ne: “Tèèka mâyì mu mbekeci ne ùmukùdikè ku dikunji, ùmonèbi, mu ngondo wa mwandamukùlù, neàpwékè àye kwinshì kwà dikunji adi ne àpinganè mu muvù wà bintu bitòloka. Wamònù anyì?” Mêmè ne: “Kùdi mukenji kampànda, kùdi mukenji wà bufùki. Meeji kampànda ngàdì matèèke mukenji awu mu bulongàme. Kacìyi ànu aci to, kàdi bìdi bikèngela bwà Meeji àmwèàmwè awu àkwatè mudimu ne mukenji awu, ùdì ùàpwékesha mu muji wà mucì amu, ne àpingana.”

Kwambayè ne: “Kacya ncìvwakù mwanjì kwela meeji pa bwalu abu to.”

<sup>143</sup> Mêmè ne: “Udikù mwà . . . Bu wêwè mwà kujandulakù Meeji àdì ènza ne mâyì à mucì awu àpatukè mu matàmbà à mucì awu, àpwékè àkabwelè mu miji ne àpinganè awu, s’ki Meeji àmwèàmwè awu àkangambilà kuntwaku dilòòlò adi awu ne: ‘Ndà, ùtentekè mùshwalà awu pa mukàjì awu.’”

Yeyè ne: “Nènku wêwè ki muyishi awu?”

Mêmè ne: “Èyowà’s, mukalenge, ncyà bushùwà.”

<sup>144</sup> Cidimu cishààle eci mwakù (yeyè ùkaadi muyè), ne pàvvà mukàjèndè wa mu lufwìlà awu musòmbe mu lutanda, munkaci mwà kuuvula bimuma byà pomè, bipòòla ku mucì wùmwewùmwè awu. Mwanèètù . . . Kumpàlà bàvvwa ne cyà kutwìpata, kabàyi bamanyè ne tuvwa banganyì to. Ki mêmè kuya kacilondela mukàjì awu, bwà ne twâkapéta dyanyìsha kùdi mulume awu. Ne kulondayè bwalu abu, kwamba ne: “Mmwenzè dijkula mu kaabujimà dyà Kilistò kumpàlà kwà kufwàye.”

<sup>145</sup> Nudi numònà’s, ncinyì cìdì cyènza ne mucì awu, m’Meeji kaayì àdì àpwékesha aci kwinshì aku awu? Mmukenji kampànda. Mmukenji wùdì Nzambì mutèèke mu bulongàme. Ne mukenji awu ki mukenji wà Nzambì wìkalà mwà kucyùka bwalu abu’s. Amen.

<sup>146</sup> Nudi bamanyè’s, nànsha wêwè mwelè mbìlà munyì, ne wamba—wamba mpindyewu ne: “Kadyàkwikala, díbà kadyàkukenkesha kàbìdi mu muvù wa luuyà ewu to.” Nedikenkeshè, nànsha bishi. Nànsha wêwè mwambè bishi ne: “Mémè—mémè—mémè ncyàkulekela bufùkù bùlwà to.”

Nebùlwe, nànsa bìshi. Bwalu cintu cítudì ne mwoyi mu cyôcì eci, cídì cibììkidiibwà ne buloba eci, ncikòntònonyìibwe kùdì mukenji wa Nzambì.

<sup>147</sup> Mpindyewu, bânà bètù bàà balùme ne bàà bakàjì, ndi muswè nnùkonkèku cintu kampànda. Dîbà adi, pììkalàbi ne tudi baledììbwe cyàkàbìdì ku Nyumà wa Nzambì... Nzambì kàtu ne tutùpà tukesè tutekète ne bitùpà binènè byà bikolè to, Yéyè ûdi Nzambì mu kaabujimà! Bu ne wêwè uvwakù ne Nzambi bûngì bukùmbànè munda mwèbè amu, mu mûshindù wà Cyàmba kwikalà ànu mundidimbì wètù ewu, abu's mbukolè bukùmbànè bwà kufuka buloba bupyabùpyà. Aci's mbukolè bukùmbànè bwà kufuka ngondo mupyamùpyà ne ndongolwelu mupyamùpyà. S'n'Nzambì, ne ncikolè! Ne mpindyewu mene mwena kwitabuua yônsò mwab'ewu ûdi ne Mwoyi wà Cyendèlèlè, mbwena kwamba ne, Nyumà wa Nzambì munda mwèbè; Bukolè bukùmbànè bwàjuulà bafwè, bwòndopà babèèdì, bwàtèèkà bijèngù byà mabùlùngà mu ngikàdilù. Kàdi wêwè, s'mbukòntònonyìibwe kùdì mukenji kampànda, Nyumà udi munda mwèbè awu. Nwénù aba's nudi bânà bàà balùmè ne bàà bakàjì bàà Nzambì. Nyumà umwèumwè ûdì nendè munda mèbè awu, neàkubììshè wêwè mwinè awu ku ditùkù dyà dibiìkà dyà ku lufù.

<sup>148</sup> Yesù, pàvvà Ye pa buloba apa, pààkafwàYe, musùùkà Wèndè wàkapweka mu Ìfernò: "Ne wàkayiisha nyumà yìvvà mu bùlokò, misùùkà ivvà mu bùlokò, yìvvà kayiyi minyingàlìle mu cikondo cyà lutùùlù cyà mu matùkù à Noà ayi." Mubidi Wèndè wàkabwela mu lukità. Kàdi kumpàlà kwà kufwàYe, Wàkalàmbula Nyumà Wèndè mu byanza byà Nzambì. Nyumà Wèndè wàkaya kùdì Nzambì; musùùkà Wèndè wàkaya mu Ìfernò; ne mubidi Wèndè wàkaya mu lukità. Ne Yesù wàkapangishiibwa dibìkkà dyà ku lufù too ne pàvvà Mufundù mwà kuula. Kàwwa mwà kwalukila to, bwali bìvvà bìkèngela Àshààlè mu lukità munda mwà matùkù àsàtù à muunyà ne à bufuku. Kàdi pààkuulà Mufundù awu wônsò, dipangishiibwa adi dyàkuumushiiibwa; Nyumà Wèndè wàkapweka kùdì musùùkà Wèndè, musùùkà Wèndè kùdì mubidi Wèndè, ne Wàkabìika ku lufù.

<sup>149</sup> Nènku twêtù patwàfwà, misùùkà yètù neyiye mwinshì mwà cyoshelu cyà Nzambi; mwaba wûngààkapetà dyésè dyà kumònà, kùkaadi ndambù wa maadindà, munùdì bamanyè amu, mu cikéenà-kumònà, mwaba wùdì Bible wàmaba awu. "Nyumà yètù neyiye kùdì Nzambi Wâkayìfila, ne mibidi yètù neyàlukilè ku lupwishi lwà buloba." Kàdi dîngà ditùkù, pììkalà Mufundu mûle, nyumà yètù neyilekelediibwè kùdì Nzambì, neyàngatè musùùkà, ne musùùkà newùye kùdì mubidi. Ne Bukolè bwàtùbììshà ku lufù abu, bùdi munda mwètù mpindyewu mene! Tudi mpindyewu mu myaba yà mu Dyulu. Tudi mpindyewu mu Bukolè bwà dibiìkà dyà ku lufù.

<sup>150</sup> Bu ne kakùvwakù mukenji bwà cyôci aci to, bânà bàà balùmè ne bàà bakàjì bàà Nzambì bàvwa bafwànyìne kudifùkila buloba kaaba aka ne kwikadilapù ne mwoyi wà pàà nkààyaabò. Wêwè awu udi ne Bukolè munda mwèbè amu bwà kucyènza. Wêwè ne mundidimbì wa Bukolè bwà Nzambì munda mwèbè amu, udi ne Bukolè bwà kucyènza. Nzambì ngwà bukolè bwônsò. Nudi bumvwè cîndì muswè kwamba aci anyì? Bukolè bûdì munda mwèbè amu abu nebûcyenzè. Wêwè udi mwà kwamba dîyì ne buloba kwikalabù kwôkò ne wêwè kuya kasòmbelamù. Âlèluuyâh! Ki bwalu mbwôbù abu's.

<sup>151</sup> Ki cîdì Bukolè mu Èkèleeyìà mpindyewu ncyôci aci, kàdi mbukòntonona kûdì mukenji kampànda. Ne mwinè mukenji awu kî ngwà “kutùmikila musùmbà wà mêtì matùma to.” Mmukenji wà diitabuuja. Yesù wàkamba ne: “Bintu byônsò bidi mwà kwenzeka bwà aba bâdì bliitabuujà.” Nènku bu wêwè mwà kucìtabuuja, cyônsò cyàswà Nzambì kulombola musùùkà wèbè bwà kwitabuuja aci, ncyèbè wêwè. Mwaba wônsò wûdì bidyacilu byènù byà makàsà mwà kudyàta awu, ku diitabuuja, Nzambì ùdi ùkupéeshawù. Amen! Ngwèbè wêwè, udi naawù, bu wêwè mwà kupeta nsapì wa ku mukenji wà diitabuuja ewu udi ukukàngwilawù's wè. Nudi numònà cîndì muswè kwamba aci anyì? Bukolè abu mbukòntonona kûdì... Pawìkalà mwânà wa balùmè wa Nzambì, pawikala wêwè udi mwânà wa bakàjì wa Nzambì, aci kacyèna cikushiyakù to. Cidi neebè dîbà dyônsò. Kàdi, diitabuuja dyèbè ndìdì diseesukaKù, kàdi Cidi ànupù. Âlèluuyâh!

<sup>152</sup> Paùdi musùngìdibwe, Nzambì ùdi ùkupéèsha diitabuuja bwà wêwè kujuuka mu bitoci byà pa buloba abi. Diitabuuja dyèbè ndìdì dicimuna maalu à pa buloba. Diitabuuja dyèbè ncinyì? Diitabuuja dyèbè mu cyenzedi cîdì Nzambì mwenzè munda mwèbè aci, bwà kukuvwija mwânà wa balùmè wa Nzambì aci. Udi ulekela mashimi èbè, udi ulekela bwivì bwèbè, udi ulekela dinwà dyèbè dyà maalà, mbwalu diitabuuja dyèbè dìdì dìkubàndisha kuulu kwàbì. Amen. Wêwè kùyi ucyènza to, kwêna ne diitabuuja nànsha dikese to. “Ne ku diitabuuja nkunùdì basùngìdibwe, ne ciinè aci ku ngâsà.”

<sup>153</sup> Mu mùshindù wìkalà diitabuuja dyèbè dilekelela awu, ki mu bûngì bwà Bukolè bûdì mwà kwikala naabù, bwalu munda mwèbè mmusòmbèle Bukolè bwà kufùka Maulu ne buloba. Nzambì mmusòmbèle munda mwènù, ne nwènù nudi bânà bàà Nzambì bàà balùmè ne bàà bakàjì. Amen! Ki bwalu mbwôbù abu's. Kàdi, ndiitabuuja dyèbè's. Yesù wàkamba ne: “Bilondèshile diitabuuja dyèbè, bìkwenzèkèlè nànkú. Bu wêwè mwà kwitabuuja, bintu byônsò bidi mwà kwenzeka. Bulelèlè, Ndi nnwàmbila ne, wêwè mwambìle mukùnà ewu ne: ‘Tentèmùkà,’ kàdi kùyi wela mpatà to, kàdi witabuuja ciwàmbì aci.”

<sup>154</sup> Dîbà adi mbantu bàà mùshindù kaayì, bàvwàbi bìkèngela bwà twêtù kwikala, biikale ne diitabuuja mu Kilistò munène udi upikula udi ne mwoyi munda mwètù ewu, Lubwebwe lutuuta lùdì kaluyì lùùmukakù mu Èkèleeyiyà elu? “Ndi neenù misangu yônsò, too ne ku ndekeelu kwà buloba mene,” Bwikadi bùdì ànukù dîbà dyônsò bwà ciinà cinènè cidi cîtùnkumuka ne lupàndu ne Bukolè bwàkapòngolodibwà ku Kàlvariyò bùbwelè mu Èkèleeyiyà abu, Bwikadi bùdì ànukù dîbà dyônsò bwà Nzambì udi ne mwoyi, Lubwebwe lunènè lutuuta lùdì lùtuuta nkòkà, lùdì lwènda lùya neetù mu lwendu lwètù alu.

<sup>155</sup> Izàlèèlè wàkajìmija diitabuuja dyèndè. Bâàkaseesuka è kuumuka mu kajila. Bâàkabanga kwalakana ngeesu yà minyiinyi. Bu bôbò bashààlè ne diitabuuja, ne biikàle biìtabuuja ne Nzambì ùvwa mwà kubàfikisha ku buloba abu, nùnku kakùvvwakù mwà kwikalà cìvwà mwà kubàpangisha to. S’bàkaavwa bamanè kukàngula mbû, s’bàkaavwa batuutè beena lukunà bààbò bipùpù, s’bàkaavwa bapoopèle beena lukunà bààbò pa nkùrusè paanyimà pààbò, ne babwelè mu buloba abu, kàdi kabàyi ànu mwà kwikala ne diitabuuja dyà kutùngunuka kuya too ne ku mulayì awu to.

<sup>156</sup> Yoshùwà ne Kaalèbà bàvwa bôbò ne diitabuuja adi! Bôbò bâàkamba ne: “Twêtù tudi batàmbe ne bukolè bwà kucìmuna cintu kanà cyônsò cidi cifwànyìne kulwa kumpàlà kwètù aci’s.”

<sup>157</sup> Ki lutâtù ndwôlò alu lùdì naalù èkèleeyiyà. Twêtù tudi mwà kucìmuna dìsaamà dyônsò. Tudi ne Bukolè abu munda mwètù. Tudi bânà bàà balùmè ne bàà bakàjì bàà Nzambì, kakwèna cìdiku mwà kwimana kumpàlà kwètù to. Cintu cìmwèpelè, Yéyè mmuswè kupeta muntu kampànda wîkalakù mwà kuciìtabuuja, wîkala mwà kwitabuuja cìkaadiku Nzambì mumanè kumwenzela. Kî ne *netwîkalè* to; tudi mpindyewu! Ne Bwikadi bwà Nyumà bùdì ne mwoyi dîbà dyônsò abu bùdi neetù. Amen! Ki bwalu mbwôbù abu’s.

<sup>158</sup> Ki cîndì muswè kwamba pângákùlù bwà cyena-bwalu mu dîndà emu cyà ne, *Mâyì Adi Anukù Dîbà Dyónsò Ápàtuka Mu Lubwebwe*. Mâyì àdi ànukù dîbà dyônsò àpàtuka mu Lubwebwe awu àdi kaaba aka mpindyewu, Mâyì àdi ànukù dîbà dyônsò àkapàtukà mu Lubwebwe lutuuta ku Kàlvariyò awu. Pààkapàtukà Nyumà Mwîmpè awu munda Mwèndè ku Kàlvariyò apu, wâkaalukila pa Èkèleeyiyà mu Ditùkù dyà Mpenta awu, Nyumà Mwîmpè umwèumwè awu ùdi kaaba aka mu dîndà emu. Ne Yéyè mmutùpèèshe mulayì!

<sup>159</sup> Ki bwà cinyì, pândì nya kumpàlà kwà babèèdì, pààkantùmà Ye ne mudimu kuntu kwâka, mêmè ndi ncììtabuuja; Nzambì ngudi mwambe nànnku! Ki mùdì bìkèènà-kumònà byènzeka nànnku; Nzambì ngudi mucilayè! Nzambì kêna mwà kushima nànnsha.

<sup>160</sup> Cítàbùùjaayi! Bìkèngela nùcítàbùùjè. Kùdi ne cyà kwikala Cintu kampànda mwaba awu, cìkàngula cijiku aci bwà kukupà mpùngà wa kubwelelapù. Cídì cítùkèngelà leelù ewu kí nkusambilà bwà kupeta Bukolè butàmbe bùngì to. Wêwè udi ne Bukolè bùngì bukùmbànè bwà kufùka buloba bupyabùpyà. Cídì cìkukèngela ndiitabuuja dyà kukwàta mudimu ne bwinè Bukolè abu. Cídì cìkukèngela nkukòntonona nsòmbelu awu, ne kwikala ne nsòmbelu wa difwànà dyà Nzambì, mu mùshindù wà ne paùdì ulòmba Nzambì cintu kanà cyônsò, udi mumanyè! Tudi ne dyeyemena kùdi Nzambì, bwà cyôci aci. Tudi bamanyè ne, twêtù tulama Mèyì Èndè matùma, Yéyè kààkutùbèngelakù cintu címpè nànscha cimwè to, twêtù twenda Nendè. Nzambì wènda neetù. Kaa, ekèlekèle!

<sup>161</sup> Bôbò bàvwa ne cintu ànu cìmwèpelè cyà dyenza. Bàvwa ne cintu ànu cìmwèpelè cyà dyenza, ncyà ne, kushààla ànu buludi mu njila. Kí nkulalakana kuya mwaba *kampànda*, ne kulalakana kuya mwaba *kansanga* to; kàdi kushààla mu njila! Èkèleeziyà ùdi ne cintu ànu cìmwèpelè cyà dyenza, kushààla mu njila! Bôbò bàvwa ne Dikunji dyà Kapyà, divwàbo naadì, bwà kudìlama bôbò biinè mu njila mu kulonda kwà Dikunji dyà Kapyà adi. Ki cìvwà cìbàlombolà. Cyàbù cintu civwabo bafwànyine kumònà, cìvwa n'Dikunji dyà Kapyà adi. BâàkaDimònà díkwàcila mudimu mu Môsà, ne bâàkamanya ne yéyè nguvwa mulombodi.

<sup>162</sup> Leelù ewu tudi ne Dîyì. Tudi tulonda Dîyì. Nènku tudi tumònà Dîyì dìkwàta mudimu mu beena kwitabuuja, nènku dîbà adi, tudi tumanya ne ki mùdibi nànnku. Nzambì ùkwàta neetù mudimu, ûshìndika Dîyì ku bimanyinu biikàle byènda bilonda! Tudi tushààla ne Dîyì. Dîyì dìdi dípàtula bipeta.

<sup>163</sup> Bôbò bâàkashààla ne Môsà. Bwalu, Dikunji dyà Kapyà, Môsà ùvwa ûlonda Dyôdì adi. Nènku bôbò bàvwa bâlonda. Pààkabangàbo kukùdimukila Môsà, ne kukòkangana bâlwisha Nzambì ne bâlwisha Môsà, bâàkaditwa mu dilalakana kuya ku luseke ne ku lukwàbò. Ndululu kubwelayì. Bushùwà's.

<sup>164</sup> Tudi twêtù tushààla ne Dîyì, ne Dîyì dìdi dípàtula bimanyinu. Yesù wàkamba ne: "Bimanyinu ebi nebìfilè aba bâdì biitabuujà Dîyì." Nwamònù's, cidi cìshààla ne... Shààlaayi ànu ne Dîyì, Dîyì dìdi dípàtula bimanyinu. Kàdi, Môsà, cyàkenzàye ncinyì?

<sup>165</sup> Bâàkalalakana, kàdi bâàkenza cinyì? Bâàkalalakana kule ne kajila aku, ne bâàkajìmija mâyì abu.

<sup>166</sup> Ngeela meeji ne ki cidi èkèleeziyà mwenzè leelù ewu. Mmulalàkàne kule ne kajila kàà Mifùndu. Bâkaadi bakadibwinkè mu tusùmbù. Bâkaadi bakadibwinkè mu tuntu tukesè tùvvà katuyì tükèngela kwenzabò to. Bâkaadi batèèke bintu kampànda. Bâkaadi batèèke bintu bu mùdì Diitaba dyà Bâpostòlò. Nudi nusangana aci penyì mu Bible? Bâkaadi batèèke

tùtèshismù tùdìbo bâbala. Bâkaadi batèèke màngumba pamutù pàà dilabula kampànda. Bâkaadi batèèke dilabulangana dyà ku cyanza pamutù paa dilabula dyà dilediibwa dyà cyàkàbidi. Bâkaadi batèèke dimyaminangana dyà mâyi pamutù pàà dibatiiza dyà mu mâyi. Bâkaadi batèèke mùshindù mubì ne: "Taatù, Mwânà, ne Nyumà Mwîmpè," pâdiku kakuyikù cintu bu nànku mu Bible to. Bible mmwambè ne: "Mu Dînà dyà Yesù Kilistò!" Kûdi cintu ànu cimwèpelè cyà dyenza pawìkala muswè Mâyi àmwèàmwè awu, kwalukila cyàkàbidi ku kajila aku. Kwalukila pa... Yéyè kî mmumùke to; Ùcidì ànu mwab'ewu. Nwêñù nudi nwangata twìtabààyi pamutù pàà Kilistò. Nudi nulalakana nuya mu biji bikolè.

<sup>167</sup> Umwe mmwambè ne: "Èè, mêmè ndi Méthodiste."

Mukwàbò wàmba ne: "Mêmè ndi Baptiste."

Aci's cìdi cileeja mûdì kùyi mwena Kilistò, dîbà adi. Twêtu tudi bâà Kilistò! Tudi Bèndè Yéyè.

Wêwè udi wamba ne: "Èè, bu, mêmè ewu, Baptiste?"

Aci ní ki cyônsò cyûdì, dîbà adi kwêna wa Kilistò to, udi Baptiste.

Wêwè udi wamba ne: "Èè, mêmè's ndi mwena Mpenta."

Pawìkalà ànu mwena Mpenta cyanàànà ku dìngumba, ki cyônsò cyûdì.

<sup>168</sup> Kàdi, pawìkalà ne dilabula dyà mpenta's! Nènku Dîyì dyà mpenta nedipatulè dilabula dyà mpenta! Londà cintu cimwècimwè cyàkenzà bayiidi aci, shààla kuulu aku too ne paùjiibwà ne Nyumà Mwîmpè.

<sup>169</sup> Nènku dîbà adi wêwè mupetè cyà cibèngàngànè ne Dîyì, nyumà udi munda mwèbè awu yéyè ùya bibèngàngànè ne cìdi Dîyì dyàmba, dîbà adi awu kî n'Nyumà Mwîmpè to. N'dyabùlù ùtentula Nyumà Mwîmpè. Nudi numònà kutùdì tukafika naaci anyì? Kaa, bàmwè bâà kutùdì mbaakùle mu myakulu, tuvwa ne bikondo byà dyela dyà mbilà, ne bintu byà mùshindù awu, kàdi bavile bikwàbò bintu byônsò ebi. Twêtu kwitaba bwà byônsò bìdì kabiyi byà mu Mifundù abi kubwelabì mu èkèleezìyà. Leelù ewu tudi pansiì anyì tudi pa kazubu? S'tukààdi baalùkile ku cikwàbò cipeèlè, bulongolodi bûme. Tukààdì badìvwijè bulongolodi, ne bajìmìje ne Mâyi ètù miinè. Aci's ki cìdi Mpenta mwenzè ànu menemene. Pààkabangàye kudìvwija bulongolodi wàkabanga kukosolola bwobùmwè, wàmba ne: "Èè, mpindyewu katwèna baswè kuswikakana to, piìkalàbi ne muntu ewu ùdi witabuuja cikampànda."

<sup>170</sup> Tùngunukààyi, shààlaayi nendè too ne pààfikàye ku Dîyì dyà Bulelèlè, dimanya dyà Bulelèlè. Nànscha ciikàle cinyì, cilekèlaayi ciye, nànscha byà munyì. Tùngunukààyi nwêñù ànu ne kuya, ikàlaayi ànu bâñà bâà muntu.

<sup>171</sup> Kàdi, kaa, kukèngelabì bwà twêtù kudìvwija bulongolodi, ne kwamba ne: “Èè, bu munudì nwénù kanùyi ba-Unitaires, bu munùdì kanùyi ba-Binitaires, anyi ba-Trinitaires, anyi bu cikampànda to, katwàkwìkala neenù mu bwobùmwè to.” Dîbà adi patùdì twenza nànku, ncinyì citùdì twenza aci? Tudi tudyàluja twêtù biinè buludì cyàkàbìdì ku cipeèlè. Ncyà bushùwà!

<sup>172</sup> Kàdi, vùlukààyi ne, Izàlèèlè pààkalalakanàye muumùke mu kajila, njila wa ku buloba bulaya awu, Lubwebwe alu kalwàkabàshiyakù to; Lwôlò lwàkashàala ànu mwaba awu, nànsha mâyì awu kàbidi. Ki mudibì kàbidi ne Nyumà Mwîmpè, ùdi ûshàala ànupù. Kabyéna bikèngela bwà twêtù kulalakana kwalukila cyànyimà to.

<sup>173</sup> Mpindyewu, mwaba ewu Nzambì ùdi ùtùlongesha cintu cinène. Mwaba ewu Nzambì ùdi ùtùlongesha dìleesònà kampànda. Kilistò wàkatucciibwa musangu wùmwèpelè, ùtùpèèsha dilabula dyà mpenta, musangu wùmwèpelè, bwà kashidi. Mpindyewu, pààkatucciibwà Lubwebwe alu, kabìvwa bikèngela bwa kutuucciibwaLu cyàkàbìdì to. Lwàkatucciibwa musangu wùmwè cyanàànà.

<sup>174</sup> Môsà wàkenza cilèma pa kuLutuuta musangu mwibidì, mwikàle ùleeja butekètè bwà diatabuuja dyèndè mu Difuta dyà cibawu adi. Kàdi Kilistò pààkatucciibwàye musangu wùmwèpelè apu, tudi bamanyè ne kabyàkukèngela bwà kutuucciibwa Yè cyàkàbìdì nànsha. Èè, cìvwa Môsà wènza aci ncinyì? Môsà ûwwa munkaci mwà kuteèka cintu kampànda cyà cipyacipyà, ùtèéta bwà kukwàtakaja cintu cyà cipyacipyà.

<sup>175</sup> Nènku’s ki cìdì balombodi bëètù bàà èkèleeyiyà benzè leelù ewu. Mbatèete kwenza cintu kampànda cyà cipyacipyà. “Netùdïvvijè twêtù biinè Assembléés de Dieu. Netùdïvvijè twêtù biinè Église Pentecôtiste de Dieu. Netùdïvvije Nsangilu wa Bônsò. Netùdïvvijè cikampànda, cikansanga, anyi cikankènga.” Aci kî ncidì Nzambì mwenzè nànsha. Aci kî ncìvwà Wendè mmwènenu to.

<sup>176</sup> Kilistò wàkatucciibwa musangu wùmwèpelè. Ki dilabula dyà ku cibangidilu ndyôdì adi. Ki njila wa cibangidilu nyêyè awu. Mu Ditùkù dyà Mpenta, Peetèlò wàkamba ne : “Nyingàlalaayi, yônsò wa kunùdì, ne nùbatijiibwe mu Dînà dyà Yesu Kilistò.”

<sup>177</sup> “Twêtù tudi tumyaminangana mâyì mu dînà dyà ‘Taatù, Mwânà, Nyumà Mwîmpè,’ tufila twitabààyi yà mishindù yônsò ne bikwàbò byônsò pa Cyôcì aci.” Patùdì tuseesuka ku Dîyì, kabyéna bikèmesha to mutùdì katuyiku mwà kukafika mwaba nànsha wùmwè to. Nwamònù anyì?

<sup>178</sup> Nzambì ùdi ùtùlongesha dileesònà kampànda. Kabìvwa bikèngela to bwà Môsà kwambayè ne: “Mpindyewu netùbangè cintu kampandà cyà cipyacipyà kaaba aka mpindyewu, ne

netùdìvvijè bulongolodi ne netwénzè èkèleeyiyà wa Kàtòlikè.” Aci ki cintu cyà kumpàlà cìdibo benzè. To, pashìishe paanyimà pàà mutancì ne: “Èè, netùbangilèpu cintu kampàndà cyà cipyacipyà, netwénzè ci-Luthérien.” Pashìishe kulwakù ba-Anglican, ne pashìishe ba-Baptistes, ne bakwabò kàbìdì, ne ba-Campbellistes, ne Èglise de Christ, ne mufwlakanyi ne Kilistò, ne bintu bikwàbò byônsò. Nwamònou’s, bààkabanga bonsò kuya, ewu ùlonda mukwèndè, ewu ùlonda mukwèndè, bènza màngumba ne malongolodi. Aci kacìvwa ncyocì to. Nudi numònà mwaba awu cìdibo bènza aci anyì? Bàdi munkacì mwà kutuuta Lubwebwe cyàkàbìdì, bwà kubangabò cintu kampàndà cyà cipyacipyà. Kabyèna bitùkèngela dilongesha dipyadipyà nànsha.

<sup>179</sup> Muntu ne muntu mu Bible wàkabàtiijibwa mu Dînà dyà Yesù Kilistò. Muntu ne muntu mu Bible wâkapeta Nyumà Mwîmpè, wàkalwa ùlonda njila wa Nzambì, anù menemene njila uvwa Nzambì mulongòlòle bwà kwikalabi. Bààkenza cintu cìmwècìmwè aci. Bààkapeta dilabula dìmwèdìmwè adi. Bimanyinu bìmwbìmwè abi byàkabàlonda. Byenzedi bìmwebìmwè abi byàkabàlonda. Bwà cinyì? Bâvwa ne mwoyi ku lubwebwe alu. Bâvwa bapetè Mâyì àmwèàmwè awu.

<sup>180</sup> Nènku, leelù ewu, cìdì cyènzè ne twêtù twìkalè ne twìtabààyì ne màngumba bûngì cyanàànà, mbwalu tudi tubanga cintu kampàndà cyà cipyacipyà. Kabyèna bitùkèngela cintu kampàndà cyà cipyacipyà nànsha. Alùkilaayi!

<sup>181</sup> Kabìvwa bìkèngela bwà Môsà kutuuta Yè Lubwebwe alu cyàkàbìdì to, kubanga cintu kampàndà cyà cipyacipyà. Bìvwa bìkèngela bwà kwakulayè naabò, ùbàmbila bwà Lubwebwe lwà ku cibangidilu alu. Kàà, ndi ntèkemena ne nudi bumvwè aci! Bìvwa bìkèngela bwà Môsà kwakulayè bwà Lubwebwe lwà ku cibangidilu, lutuuta alu; kabiyi bwà kuteeta bwà kuLùtuuta cyàkàbìdì to, kabiyi bwà kuteeta bwà kubanga cintu cyà cipyacipyà to, kàdi kwakula ne Cintu cyà kale aci!

<sup>182</sup> Nzambì, nkwàcishèku! Piìkalàbi ne ndi mfwà bu muntu mulanda, mu cyambilu emu, mêmè nêngààkulè bwà Lubwebwe lwà ku cibangidilu alu! Nêngààkulè bwà dilabula dyà ku cibangidilu adi. Nêngaakulè bwà Mifündù yà ku cibangidilu yàkabapèeshà bôbò abu Nyumà Mwîmpè ayi: “Nyingàlàalaayi, yônsò wa kunùdì, ne nùbatijiibwè mu Dînà dyà Yesù Kilistò bwà dilekelediibwa dyà mpèkaatù, nènku nenùpetè kupà kwà Nyumà Mwîmpè.” Bwikadi bùdì ànukù dîbà dyônsò bwà Mâyì àfùkuka mu Lubwebwe abu bùcìdi ànu neetù. NeBùpatulè cintu cìmwècìmwè aci. NeBùpatulè bìkèènà-kumònà. NeBùpatulè dyondopa kabùkabù. NeBùpatulè bipròfetà. NeBùpatulè cintu cyônsò cyàkenzàbo bôbò aci.

<sup>183</sup> Izàlèlè pààkadítèkàye cyàkàbìdì mu mulongo mu Mifündù, ne mwalùkile mu njila, bààkatùngunuka too ne ku buloba bulaya. Kàdi byàkabàngata bidimu makùmi ànaayi.

<sup>184</sup> Mpenta wěnjì bidimu bitwè ku makùmi ànaayi anyì makùmi àtaanu, bënda bâlalakana mu cìpèèlè. Alùkilaayi ku Lubwebwe! Lùdi kumpàla lumwènèke. S'ncyôcì eci, cifûnda kaaba aka mene mu Dîyì. Nyumà Mwîmpè ùdi apa munkacì mwà kwenza cintu cìmwècìmwè cïkaadì Ye mwenzènze misangu yônsò aci, pa nànkú Bwikadi bwà Mâyì bütù ànukù dîba dyônsò abu's büdi kaaba aka. Alùkilaayi ànu cyanàànà kùdibùku aku, alùkilaayi ku cyà kale, cyà ku cibangidilu aci. Bivwa bishì ku cibangidilu?

<sup>185</sup> “Èè, bàvwa bâlabula muysiishi ku cyanza anyì”? Cintu bu nànkú to. “Bàvwa bàbâtijiibwa mu dînà dyà ‘Taatù, Mwânà, Nyumà Mwîmpè anyì’”? Cintu bu nànkú kacitukù to. Kakùtukù bantu mu Bible, mwaba nànsha wùmwè, anyì (pakuumusha mu bidimu nkàmà yìsàtù) pambèlù pàà Bible, bâkaavwàku babâtìjìibwe mu dînà dyà “Taatù, Mwânà, Nyumà Mwîmpè.” Aci ntwitabààyi wa Kâtòlikè, kí ndilongesha dyà Bible to. Nwamònou anyì?

<sup>186</sup> Bôbò bàvwa ne Nyumà Mwîmpè. Bimanyinu ebi bìvwa bílonda bàvwà biitâbùuje. Nebìbâlondè kâbidi leelù ewu. Lubwebwe alu lùdi ne mwoyi kashidi ànu mûvvàlu kwônsò eku amu, Lubwebwe lutuuta alu!

<sup>187</sup> Katwàmbikù ne: “Èè, mpindyewu lwâ ùshààla wa mu èkèleziyà wetù wa beena-Mpenta, ùbwela mu bipaapu byètù byà cyenà-Mpenta to.” “To, lwâ ùshaalè wa mu ba-Baptistes, anyì ba-Méthodistes, anyi ba-Presbytériens, anyì beena Kâtòlikè.” Ncinyì aci? Aci's nkutuuta Lubwebwe alu cyákàbidi, kuteeta bwà kutwadija cintu cìkwàbò cyà cipyacipyà.

<sup>188</sup> Bâmbilaayi ne: “Nyingâlalaayi, nùbatijiibwè mu Dînà dyà Yesù Kilistò,” bwà dilekelediibwa dyà mpèkaatù yàbò, “ne bimanyinu ebi nebilonde aba bâdì bìtabujà.” Mpindyewu nwalùkìdì mu njila, nwalùkìdì ku Mâyì àmwèàmwè awu. Mâyì àmwèàmwè awu neàfilè cyashima cìmwècìmwè aci. NeÀfile dikezula dìmwèdimwè adi ku mubidi. NeÀfile bukolè bwà disukula bùmwèbùmwè abu. NeÀfile bukolè bwà dyondopa bùmwèbùmwè abu. NeËnzè cintu cìmwècìmwè cyéñzèlèwu musangu awu aci, bu twêtù ànu mwà kwalukila ku Nyumà umwèumwè awu.

<sup>189</sup> Mwoyi wùdì mu mwonjì wà mvinyò newùpatulè tumuma twà mvinyò. Piìkalàwu mutùpâtùle cidimu cishààle, newùpatule cintu cìmwècìmwè aci cidimu eci. Awu mmukensi wà Nzambi. Mukenji wà Nzambi wùdì ne, byôbì ne ewu mmwonjì wa mvinyò, wùlekèlè ànu cyanàànà, newùpatulè tumuma twà mvinyò. Udi mwà kuwùsopakaja ne cikwàbò cintu kampànda, kâdi pashìishe kuwùlekela cyanàànà, newàlukilè cyákàbidi buludì ku tumuma twà mvinyò tûmwètùmwè atu.

<sup>190</sup> Ki mutùkaadì twêtù basopàkàje èkèleziyà ne cyena Mpenta, ne ci-Baptiste, ne ci-Méthodiste, ne ci-presbytérien, ne—ne ci- Anglican, ne kasùmbù kàà mùshindù mukwàbò wônsò. Bwà

cinyì kanùyikù nucilekela? Alùkìlayi ku Mwonji wà mvinyò, necyàlukilè ku Bukolè bùmwèbùmwè abu. Amen! Amen! Ndi munangè aci.

<sup>191</sup> “Babangà cintu kampàndà cyà cipyacipyà.” Cintu cìmwècìmwè citùkaadì benzè aci’s. Kî nkuteeta kuleeja bukòòkeshi bwètù to. “Docteur Kampànda ki mujuudi wa èkèleziyà Kampànda wa munène wa bikampàndà-ne-bikansanga awu.” Kacivwa aci nànku to.

<sup>192</sup> Ki cyàkambà Môsà ne: “Mêmè nêmbâleejè cîndì mwà kwenza. Néndwe naaci, nànscha bìshi!” KuLùtuutayè, kâkalwa to. Kwelayè cyàkàbidi lubilà ne: “Nêmbâleejè cîndì mwà kwenza!” Nzambì kulumbatangana Yè nendè bwà cyôci aci.

<sup>193</sup> Kwìkadikù wela meeji ne, bu wêwè “ànu mwà kushààla mukwàte ku dìngumba kampànda.” Nzambì neàlumbatangana neebè bwà cyoci aci. Ncyâ bushùwà menemene. Bikèngela wàlukilè ku cyà ku cibangidilu aci’s. Alùkìlè.

<sup>194</sup> Akùlà wêwè ànu ne bantu. (Kùbâmbidì ne: “Lwâyi nùshaalè bâà mu èkèleziyà wetù. Lwâyi nwàmbululè twìtabààyi wetù twêtù to.”) “Alùkìlaayi nùnyingalalè, nùbatijiibwè mu Dînà dyà Yesù Kilistò, bwà dilekelediibwa dyà mpèkaatù yènù; nènku nenùpetè kupà kwà Nyumà Mwîmpè, pìikalàbi ne myoyi yènù mmilulàme. Ne bimanyinu ebi nebifilè beena kwitabuuja. Kasùmbù kàà beena kwitabuuja, bimanyinu ebi nebìbàfilè.” Bwà cinyì? Lubwebwe alu, Lubwebwe lutuuta alu ne Mâyì Àlù à Mwoyi àdi àpàtuka ànu buludì, àpàtula cintu cìmwècìmwè cyàkenza Yè kwâka aci. KaÈna ànu mwà kupanga kucyènza to. Kàa, éyowà’s.

<sup>195</sup> Twêtù tutu ànu baswe kudìtwà makùmbù, twamba ne: “Twêtù tudi ba-Méthodistes, ne ba-Baptistes.”

<sup>196</sup> Akùlà wêwè ànu ne Lubwebwe alu cyanàànà, Yèyè ùdi Bwikadi bùdiku dîbà dyônsò. Kûteeci bwà kushààla wa ku Bwôbù to. Mêmè ndi mupetè “dilamakana” mwaba ewu. Wêwè kûteeci bwà kushààla wa ku Bwôbùto. Kwêna mwà kushààla wa ku Cyôci ecito, ki cintu cimwèpelè cyà bushùwà neyôci aci. Udi mwà kashààla wa mu ba-Méthodistes, udi mwà kashààla wamu ba-Baptistes, udi mwà kashààla wa mu beena Mpenta, udi mwà kashààla wa mu ba-Anglicans, kàdi kwêna mwà kushààla wa ku Eci to. To. Bikèngela ùjìbwè tèntè ne Eci. Kushààdi wa ku Cyôci to; ùjìbwè ànu naaci cyanàànà. Kwàjikì. Ncyûle ne cinyì? Ncyûle ne Bukolè, cyûle ne Nyumà, cyûle ne Mwoyi, cyûle ne disàンka, ditalala, mwoyi mule, musàngeelu, bwîmpè, Bukolè bwà Nyumà Mwîmpè mu nsòmbelu webè, bwalu Bwikadi bwà kashidi bùdimù. Vùlukà.

Nebikengelè bwà njikijè, bwalu dîbà dîkaadi dyènda dìpità.

<sup>197</sup> Kàdi, vùlukààyi ne, Lubwebwe alu kalwàkabàshiyakù to. Kacya kaLwàkabàshiyakù to. Ne Kilistò kààdyàkutûshiyaku to; Kilistò mmwambè ne: “Nêngììkalè neenù misangu yônsò, mene

too ne ku ndekeelu kwà buloba.” Ncyà bushùwà anyì? Nènku Lubwebwe alu lwàkashààla naabò njila mujimà awu kuumukila ànu ku Holèbà to ne ku Neebò. Lwàkashààla naabò cyà bushùwà. Kupweka too ne ku Yadènè, lucivwa ànupù. Eyì Nzambì wa yààyà, mêmè ndi muswè kuLùmòna ku Yadènè!

<sup>198</sup> Môsà, pàvwàye ku Yadènè, Lubwebwe alu lùvwa nendè ku ntwàdijilu too ne ku ndekeelu. Ne yéyè ûvwa mwimàne pù, ùtùma mésù pansiù ùtàngila musùmbà wa-wa bantu bàvvà batwè cimpìngà ne bayè kule ne Nzambì abu. Mwoyi wèndè wùvwa wùbàjinga. Ki kutàngilayè Yadènè. Ki yéyè uvwa ku Yadènè wàwa. Yadènè, wa nyumà awu, ngündi mêmè ngamba ewu. Nènku ki yéyè ubi mwimànekù wàwa, lufù lùvwa lwenda lùseemena pabwípì nendè. Kàdi kutàngilayè, ku luseke lwèndè aku kùvwa kusanganyiibwà Lubwebwe alu. Yéyè kutùpika è kubàndayè ànu pa Lubwebwe alu, ne Banjèlo kulwabò, kumwambula è kuyabò nendè.

<sup>199</sup> “Mêmè ncyàdyàkukushìya anyì kukulekelakù nànsha.” Bikondo nànsha bilwè kukola bishi, nànsha twétù balwè bakùlakajì bishi, nànsha bafwè lufù lwà mùshindù kaayì, vùlkààyì ne, Lubwebwe alu nelwikalèku ku Yadènèaku. Lwòlò kalwàdyàkutùshìya anyì kutùlekelakù to. Ikàlààyì ànu bavùlùke nànku. Bwikadi bwà díbà dyônsò bwà Mâyì àdì apàtukà mu Lubwebwe awu nebwikalè neetù mu mwoyi wètù mujimà wà pànwapa, ne mene too ne ku Yadènè.

<sup>200</sup> Twìnyikààyi mitù yètù. [Mwanèètu wa balùme kampàndà ùdi ùfila dikànkàmika—Muf.]

<sup>201</sup> Pàcìdì Nyumà awu ùkwàta mudimu munkaci mwètù apa, Nyumà wa Nzambì munkaci mwà kukwàta mudimu munkaci mwètù, kùdikù mwà kwikalà kaaba aka mu dìndà emu aba bàdì kabàyi bamanyè Kilitò, ne wêwè-wêwè kùyi pabwípì ne Lubwebwe alu, kùyikù mu bwobùmwè naaLù mu dìndà emu anyì? Kàdì ubi mumanyè ne Lùdipù. Tàngilà mùdìLu munkaci mwà kukwàta mudimu mu myaba yônsò, ùmonè mùdìYe munkaci mwà kunyùnguluka ùtwa eku ùtwa eku, ùmonè mùdìLu lùkwàta mudimu pa bantu. Ki Bwikadi bwà Mâyì bùdiku díbà dyônsò mbwòbù abu. Ki lupàndù ndwòlò alu. Ki Nyumà ubi munkaci mwà kuuja mpànzà yàbò mu mùshindù wà kabàciyikù mwà kushààla bapùwe to, bikèngela bwà cintu kampàndà cipatukè. Kàdi wêwè kùyi mu Mumanyè to, udikù mwà kuswà bwà kwela cyanza cyèbè muulu anyì bwà kwamba ne: “Nsambìdilèku, Mwanèètu Branham. Ndi mpindyewu muswè bwà mmu Mumanyè. Ne ndi muswè bwà ngààkulèku Nendè, ne ndi muswè bwà mMumanyè bu kaabujimà kàà Nyumà Wendè. Ndi muswè kumanya ne Yéyè ubi ku luseke lwànyì mene eku, díbà dyônsò. Ndi ngiitabuuja ne Yéyè ùdikù. Kàdi ndi muswè bwà twikaleku tuyukilangana. Ne mêmè ndi ne nyòòtà, ne ndi ne nzala yà Nzambì. Ndi muswè ntambè ku Mumanya”?

<sup>202</sup> Nzambì àkubènèshè, mukalenge. Ne Nzambì àkubènèshè, mukalenge. Ne wêwè awu, mwanèètù wa balùme. Wêwè, èyowà, paanyimà lwà mu ndekeelu mwàmwa. Kwinshì eku, inábànzà, èyowà. Èyowà, inábàンza. Twêtù tudi bamòne byanza byènù abi, ne Nzambì mmubimòne. Nzambì àkubènèshè, wêwè nsongààlùmè. Nzambì àkubènèshè. Ne wêwè, inábàンza. Amen. Nzambì àkubènèshè. Àkubènèshè, mwanèètù wa bakàjì. Muntu kampànda mukwàbò mpindyewu, mu cikondo cyà cinyàànyà aci. Nzambì àkubènèshè, lwà paanyimà pààpa, wêwè nsongààlùmè.

<sup>203</sup> Elàngànaayipù meeji. Elàngànaayipù meeji, Bwikadi bwà Mâyi àdiku díbà dyônsò àpàtuka mu Lubwebwe awu abu, Nyumà umwèumwè awu; wâkeelela Yé lubilà lukolè Bwèndè Yéyè mu ditùkù dyà cilumbulwidi, pààkangatà Ye dinyooka dyètù apu awu. Ne lukodì lwà cijì cikolè cyà Nzambì lwàkatuuta pambidi Pèndè, ne mpèkatù yèbè yìvwa mijìngila mu lukodì alu, ne lwàkaMutuuta, ne Mashi Èndè ne mâyì byàkazòloloka bìpàtuka munda Mwèndè. Kwamba Yé ne: “Taatù, mu byanza Byèbè mmûNdî ntèèka Nyumà Wanyì.” Nènku mu Ditùkù dyà Mpenta, Wàkalwa bwà kuya neetù mu lwendu lujimà. Ne Yéyè ùdi pabwîpì menemene mpindyewu.

<sup>204</sup> Swàku bwà wàmbè ne: “Ndi mulalàkàne kule be ne kumbèlu, Mukalenge, nyewù ngaalukila kumbèlu.” Patùdì munkacì mwà kwimba eci apa, bu wêwèku mwà kuswà kuseemena ku cyoshelu eku, kàbìdì, kwenza didilàmbula dyà cyàkàbìdì, dyà musùùkà wèbè, kùdì Kilistò? Amen.

Mvwa mulalàkàne muye kule ne Nzambì<sup>(Mupàtuke mu kajila.)</sup>

Mpindyewu nkààdì ngaalukila kumbèlu;  
Ndi mwendèle mu kajila kàà (Bupidyà,  
nudi bamònè's.) ntàntà mupite bule ndi  
mwendèlemù,

Mukalenge, nkààdì ngaalukila kumbèlu.

Ngaalukila kumbèlu, ngaalukila kumbèlu,  
Bwà kubènga kulalakana kàbìdì;  
Baalà bikolè mabòkò Èbè à dinanga awu,  
Mpindyewu, Mukalenge, nkààdì ngaalukila  
kumbèlu.

<sup>205</sup> [Mwanèètù Branham ùdi wìmbila mu matàma *Mukalenge*, *Nkààdì Ngaalukila Kumbèlu*—Muf.]

<sup>206</sup> Bânà bakesè bàà balùme bàsàtù bàdi bàpàtuka buludì, lukàsà menemene, ne binsònji mu mêsù, batwa binù ku luseke lwà cyoshelu. Mu bushuwà bwà bwalu, mbafwidìibwè luse. Mbafwidìibwè luse kumpàlà mene kwà kuumukabò pa myaba yìvwàbò basòmbe, pàvwà dipàngadika dyàbò dikesè adi dyangàcìibwè. Nyewù balwè buludì kumpàlà eku batwè binù kaaba aka, bwà bantu kumanyabò ne, nduseke lwà nganyì lùdibò, mu dìndà emu.

<sup>207</sup> Mvwa mufwànyìne kwela meeji ne kùvvwàkù mwà kwikala bantu bakùlumpè bàvwà mwà kuswà kwenza cyôci eci, anù kuswà cyanàànà bwà kutwà binù, kwamba ne: “Mukalenge, ndi—ndi mulalàkane tuyè kule ne kajila. Ndi mupetè mpatà bûngì cyanààna, ne mîngà misangu ndi mulalàkàne mukabwelè mu mpékaatù. Mpindyewu ndi—ndi muswè bwà kwalukila kumpàlà kwà díbà kwikaladì dipìte. Nzambì, ndi—ndi muswè kulwa. Ndi muswè cyà bushùwà ànu bwà kulwa kutwà binù.” Amen.

<sup>208</sup> Mpindyewu, bânà bakesè bàsàtù bàà bakàjì bàà Arthur Beam, bàmba kwikala bule bùmwè, mbalwè mwab’ewu, batwè binù.

<sup>209</sup> Udi useemena ewu mmwâñà mukesè wa bakàjì udi mufûme ànu ku dipeta mwanààbò wa balùme kwàbò kumbèlu. Ditùkù adi mvwà ànu musòmbe; Màndàmù Wood kulwayè kungambilà, kwamba ne mwanèètù wa bakàjì ewu ùvvwà ùya ku lupìtaadi bwà kulela. Nyumà Mwîmpè kwamba Yè ne: “Ndà ùbàmbìlè ne neikalè mwâñà wa balùme.” Pààlediibùye, ùvwa mmwâñà mukesè wa balùme.

<sup>210</sup> Mbimwèke ne mbânà bakesè mu dìndà emu, bânà bakesè bàpàtukila mu kàalaasà kakesè kàà Mwanèètù wa bakàjì Arnold, bâlambula nsòmbelu yàbò. Cyoshelu cijimà, ku dyàbalùmè dyànyì eku, ncyûle tèntè ne bânà bakesè.

<sup>211</sup> Mbifwànyìne kwikalakù bilenga’s bu twêtù mwà kwimba musambu kampànda, cyoshelu, bwà bakwàbò bantu, bakùlumpè.

Mpindyewu, Mukalenge, nkààdi ngaalukila kumbèlu.

Ngaalukila kumbèlu . . . ( . . . ? . . . )

Bwà kubènga kulalakana kabìdì;  
Baalùlà bikolè mabòkò Èbè à dinanga awu,  
Mpindyewu, Mukalenge, nkààdi ngààlukila kumbèlu.

<sup>212</sup> Twìnyikààyi mitù yètù bwà katancì kakesè cyanàànà, bwà disambila, bwà bânà bakesè aba.

<sup>213</sup> Taattù wa mu Dyulu, kwôkù kulwà mààlabà kampàndà, bu Yesù mwà kunènga kàbìdì bwà bikwàbò bidimu dikùmì anyì dikùmì ne bítaanu, aba nùnku mbìikàlà bânà bàà balùmè ne bàà bakàjì bààtwàdilà nkòngò mikwàbò yicìlwàlwa ayi Mukenjì ewu. Kakuyì mpatà to mu àànyì meeji, Mukalenge, bwà ne mu matùkù àbò ónsò à mwoyi nebiikale bàvùluka ne bààkaseemenakù ku cyoshelu eci. Ne bôbò ntuubilengà twà tukesè, Mukalenge. Tuumyoyi twàbò tukesè twâñà tutekête ne twà dinanga atu nyawù twâpiishiibu mu dìndà emu. Kabèèna nànsha bateèlèje Diyiisha dyônsò to; bafùme àmu ku dipàtuka mu cibambalu amu, ku ditèèleja dyà dyakula dyà Mwanèètù wa

bakàjì Arnold; baseemène mu nyÙngulukilu wa cyoshelu kaaba aka, bafilà tuumyoyi twàbò tukesè etu KÙdì.

<sup>214</sup> Mpindyewu, Taatù, ndi mfùma ku dyakula ngamba ne munda mwètù mmÙdì Nyumà Mwímpè musòmbèle. Ne Nyumà Mwímpè ewu, ditabuuja pàmwè ne Nyumà, didi dyènza bintu byônsò. Ne ndi ngiitabuuja ne pa dìbà edi mene, Wêwè udi ufwà luse mpèkaatù yônsò udibò benzè. Ne mêmè ndi nKulòmba, ne diitabuuja dyônsò didì mu mwoyi wànyì ne, Wêwè wâlamakù nsòmbelu yàbò mikesè ayi mu njila mujimà wa Iwèndu. Swàku bwà kabàpambukukù mu Njila ewu nànsha.

<sup>215</sup> Ncyà bushùwà ne eci ncintu cyà pabwàcì. Nyumà wâmbì mu dindà emu ne, tuvwa mwà “kumònà cintu kampàndà cyà pabwàcì.” Nzambì, Wêwè mujikìje kukwàta mudimu ne bakwàbò, wàngatèku bânà bakesè. Mùshindù mwine wùdibì mu dindà emu ne, mu dibìkila dyà ku cyoshelu, kakùyi muntu mukùlumpè nànsha umwe, kàdi musùmbà mujimà wà bânà bakesè bâdi balwè’s. Kàdi pààbì, dìrwa n’Diyiisha dinène dikolè kuumvwà, nànsha mene bwà bantu bakùlumpè, kàdi bânà mbàdì babàkùle Nyumà waDì. Tudi tukwela twasàkidila bwàbò bôbò, Taatù. Ndi nKupèèshabò, mêmè bu musadidi Webè, bôbò bu bivùlukilu byà disangisha edi; bwalu, mwikàle mvùluka ne Bwikadi bwà Mâyì à Mwoyi bùdì ànuku dìbà dyônsò abu nebwikalè bùtuuta nkòkà pàmwè naabò misangu yônsò yîkalàbo ne mwoyi. Swàku bwà biikkalèku ne diitabuuja mpindyewu ànu mu cìdì munkacì mwà kwenzeka eci ne, Nzambì udi mubàkòke mubùmùshe mwaba wùvvwàbo basòmbe awu mubàtùme kaaba aka awu, àswékù bwà biikkalè ne diitabuuja mu Nzambì awu matùkù àbò ônsò à mwoyi. Swàku bwà nyumà yàbò yà mikesè ayi yàfikishiibwakù KÙdì mu ditùkù dyà lufù lwàbò; yàlujiibwakù ku mubidi wàbò mu ditùkù dyà dibìkkà dyàbò dyà ku lufù. M’ Béèbè Wêwè, Taatù. Tudi tuKupèèshabò mu Dînà dyà Yesù.

<sup>216</sup> Patùcìdì ne mitù yètù miinyika apa. Nêngìkalèku mwà kulòmba bânà bakesè bônsò bâdi ku cyoshelu aba, bâdi biitabuuja ne Yesù m’MusÙngidi wenù, ne Yéye ngWânwambìdì, paanyimà apu mu batèèleji amu, bwà nuseemenè mwab’ewu ne nùtwe binù pabwipì ne cyoshelu apa. Udi witabuuja ne Yesù mmukunangè ne ùdi üfwà mpèkatù webè luse anyì? Ndi muswè bwà nwènù bonsò nùjuukilè kuulu ne nùtangilè paanyimà ku batèèleji eku. Eci, ki mùshindù wunùdiku mwà kwambila bantu ne nudi nwitatbuuja ne Yesù ùdi ùnùsÙngila. Mpindyewu, juukilaayi kuulu, ncyà bushùwà, ne nùtangilààyì buludì ku batèèleji. Nwènù bônsò bânà bàà balùmè ne bàà bakàjì batekète bâdi banange Yesù abu, juukilaayi kuulu nùtangilè kùdi disangisha kwàka, yônsò wa kunùdì.

<sup>217</sup> Kàdi bishi nwènù bânà bakesè bàà bakàjì bâdi kumpàla eku aba? Nudi nwitatbuuja anyì? Nudikù banangè Yesù anyì? Nwènù bânà bakesè bàà bakàjì aba, nudikù banangè Yesù ne mwoyi wènù wônsò anyì? MmÙdìbi anyì? Nudi baMunangè anyì?

Wéwè udi muMunangè anyì, munanga wanyì? Juukìlà kuulu wìmanyinè apa, bwà bantu kumanyabò ne wéwè udi munangè Yesù. Nzambì àkubènèshè.

<sup>218</sup> Mpindyewu tükudimukààyì mùshindù *ewu* ne twimbààyì bwà bantu aba kumpàlè kwà twêtù kuumuka ne: “Yesù mmunnangè! Eci ndi mumanyè, ki mùdì Bible ùngambilà.” Nwamònou anyì? Twélàayi ànu byanza muulu cyanàànà patùdì tuwìmba apu mpindyewu. Èyo, tuwimbààyaaaku.

Yesù mmunnangè! Ndi mumanyè cyôcì eci,  
Bwalu ki mùdì Bible ùngambilà;  
Bâna bakesè m’Bèndè,  
Bôbò bàdi ne butekète . . .

<sup>219</sup> Mpindyewu elààyì byanza muulu . . . ? . . . Twêtù bônsò cyàpàmwè:

Èyowà, Yesù mmunnangè,  
Èyowà, Yesù mmunnangè,  
Èyowà, Yesù mmunnangè,  
Ki mùdì Bible ùngambilà.

<sup>220</sup> Mpindyewu nwénù bônsò ambùlùayi paanyimà pàànyì: Mêmè ndi ngiitabuuja ne Yesù Kilistò ùdi Mwânà wa Nzambì. Leelù, mêmè ndi mMwitaba bu Musùngidi wanyì sungasunga. Kubangila ànu ku ditùkù edi, kubangila ànu ku mpindyewu, mêmè nêmMunangè ne nêmMukwàcile mudimu. Amen.

<sup>221</sup> [Mwanèètù Ben Bryant ùdi wàmba ne: “Mwanèètù Branham, ndi ne bâna bânaayi pa mwoyi wànyì patùdì twakulangana apa. Udkù mwà kubàsambidila anyì?”—Muf.] Ncyà bushùwà ne nembàsambidilè, Mwanèètù Ben.

<sup>222</sup> Taatù wa mu Dyulu, muntu ewu nyewù umònà bakwàbò bâna abu bâlwa kùdì Kilistò, ne nyewù wèla lubilà lukolè, bu taatù, bwà bâna bêndè bakesè sungasunga. Nènku Nyumà udi mufikishe bâna bakesè aba ku cyoshelu awu, swàku bwà Nyumà awu àsingile bâna bêndè, Mukalenge. Enzàku nànku. Nyewù tuKupèèshabù, Taatù, mu Dînà dyà Yesù Kilistò.

<sup>223</sup> Mpindyewu nwénù bâna bakesè panùdì nwalukila ku myaba yenù yinùdì basòmbe apu, ndi muswè bwà bantu bônsò bàdi mu mulongo wàwa abu bâlabulèku bâna bakesè aba ku cyanza, anyì kubàtuutaku tuumapi pàdìbo bënda bàìlukila apu. Alùkìlaayi bônsò ku myaba yenù yinùvwà basòmbe, nuyiila *eku*. Ne bantu bônsò bàdi kwàka nàka bàba biìkalè ànu bàtuutakù bâna bakesè abu tuumapi. Ne twêtù tudi banùnangè ne myoyi yètù yônsò. Nudi bidimba byà Mubidi wà Kilistò, byà mwomùmwè mene mu Wôwò awu ànu mùdì bakwàbò bàà kutùdì amu’s.

Tudi twenda batàngile ku Siònà,  
Siònà mulenga, mulenga kumònà;  
Tudi twenda tubànda batàngile ku Siònà,  
Cimenga cilenga cyà Nzambì aci.

Lwâyi, twêtù bàdì banangè Mukalenge,  
 Ne masànkà ètù àmanyishìibwè,  
 Tùdísangààyi mu musambu ewu ne cyonà  
 cilengèle,  
 Tùdísangààyi mu musambu ewu ne cyonà  
 cilengèle,  
 Ne mùshindù awu tunyùngulukila Nkwasa wa  
 butùmbi,  
 Ne mùshindù awu tunyùngulukila . . .

Awu nngimbilù mulenga wa dikèma! Twélààyi byanza  
 muulu mpindyewu.

Tudi twenda batàngile ku Siònà,  
 Siònà mulenga, mulenga kumònà;  
 Tudi twenda tubànda batàngile ku Siònà,  
 Cimenga cilenga cyà Nzambì aci.

Tùlabulanganààyi ànu ku cyanza cyanàànà muntu ne  
 mukwèndè patùdì twimba mpindyewu apa.

Tudi twenda batàngile ku Siònà,  
 Siònà mulenga, mulenga kumònà;  
 Tudi twenda tubànda batàngile ku Siònà,  
 Cimenga cilenga cyà Nzambì aci.

<sup>224</sup> Mpindyewu tûjuukilààyi kuulu ne mitù yètù miinyìka,  
 patùdì . . . Imbà musambu awu ku cisanjì Mwanéetu Teddy, ànu  
 bwà . . .

<sup>225</sup> Ndi ne ndambù wa malòmba mwab'ewu, ne mishwalà  
 ne bikwàbò. Bidi mwà kwikalà bifùmìnè dyàmwamwà dyà  
 mbû. Billy ùvwa ùngambilà ne bàvwa ne tushesheetè tùbìdì  
 twà bânà twà kùdì mwânà wa mu dibòkò mu Angleterre  
 mwàmwa, twà bule ebu's, kakwàcikwètù aka nkacibükile pansi  
 kakuyì mûshindù to. Ne pa nànku, bivwa bìkèngela bwà twêtù  
 kusambilà kabìdì bwà cyôcì aci.

<sup>226</sup> Ne pa nànku . . . [Mwanéetu Ben Bryant ùdi wàmبا ne:  
 "Mwanéetu Branham, bu wêwè mwà kuswà mfwilèku luse bwà  
 dikukosoloja, kàdi sambìlakù bwà né, ewu uvwa mudituute ku  
 kàshinyì keètù makèèlèlè diloòlò, ku dilata dilami dyà bitoci  
 dyà kumpàla ku dyà balumè dyànyì adi, sambìlakù bwà cyôcì  
 aci cyàmònà mwà kusokolodiibwa. Sambìlakù bwà Mukalenge  
 àcìsokòlòlèku." —Muf.] Amen, Mwanéetu Ben, ncyà bushùwà ne  
 nêngènzè nànku. [Mwanéetu Branham ùdi wìmbila mu matàma  
 Tudi Twènda Tuya Batàngile Ku Siònà.]

<sup>227</sup> Patùdì twenda twenda apa, Mukalenge, tudi bamanyè ne  
 Lubwebwe lutuuta alu lùdi ànu neetù mu lwendu mu njila emu,  
 Bwikadi bùdi ànukù díbà dyónsò bwà Mâyì à mu Lubwebwe  
 abu bùdi bwènda búya pàmwè ne Èkèleeziyà. Èyì Nzambì wa  
 Cyendèlèlè, tûpongolwéléku, mu dìndà emu, diitabuuja mu  
 Nzambì udi neetù ewu. Ndi mumanyè ne Wêwè neùcyéñzè,  
 ànu mutùdiku twêtù mwà kuKulengeleela amu, bwà Wamònaku

mwà kutwèyemena naaCì. Wêwè mutùpèèsheCì tèntè mu nzùbu tèntè pambèlu, tudi bafwànyìne kukwàta naaCì mudimu bibì, Mukalenge. Kàdi piìkalàbi ne tudi bapetèku ngâsà Kûdì, cyènzekèku.

<sup>228</sup> Mwanèètu nyewù wàmbì ne muntu kampàndà mmudìtuutè ku kàshinyì kèndè. Èyì Nzambi, tudi bamanyè ne këna ne mfrangà bwà kwenzayè bintu ebi to. Ndi ndòmba bwà Úfikishèku muntu awu ku ditwìshibwa, anyì cintu kampànda, bwà yéyè wàmònakù mwà kunyigalala bwà dyenza dyà cintu aci, àlwe, wàmба ne: "Mwanèètù, nêndongololè kàshinyì kèèbè aku, mêmè ngudi mucyénzè awu." Kwàcìshàku Mwanèètù Ben ne bananga bëndè.

<sup>229</sup> Mu cyanza cyànyì emu mùdi mùsanganyiibwa mìshwalà ne malòmba, byà bâdì ne diitabuuja mu Nzambi awu. Môsà ùvwa ne diitabuuja mu Nzambi awu, ne wàkasabuka mbù. Danyèlè ùvwa ne diitabuuja mu Nzambi awu, ne wàkapàtudiibwa mu bwinà bwà ntambwe. Shadràkà, Meshàkà, ne Abèdènègò, bàvwa ne diitabuuja mu Yéyè, ne bààkajima kapyà.

<sup>230</sup> Pôlò ùvwa ne diitabuuja mu Yéyè, ne dînga ditùkù pàvvà masangisha miikàle makolè menemene ne Pôlò kàyiku mwà kufika kùdì bantu bônsò, wàkangata ànu mùshwalà, wàkamba ne: "Ndi ngiitabuuja ne Nzambi ùdi naanyì." Ùvwa ûtenteka byanza pa mìshwalà ne tulùlù, ne nyumà mibì yìvwa yùmuka mu bantu, ne mabèèdì ne màsaamà àvwa ùmuka mu bôbò. Nzambi, mêmè ndi ne diitabuuja mu Nzambi umwèumwè awu. Swàku bwà mubì awu ùmukè. Mabèèdì, màsaamà, ne ntàtù, swàku byùmukè, Mukalenge.

<sup>231</sup> Wêwè udi Nzambi umwèumwè wâkaakula naanyì mu Dikunji dyà Kapyà adi awu, ku musùlù kwâka. Wêwè ki Mwena fòtô Webè udi mukùdika mwaba ewu pàmwè naanyì, ku cimanu eku ewu. Wêwè udi neetù, Mukalenge. Wêwè udikù dîbà dyônsò, Dikunji dyà Kapyà dimwèdìmwè adi. Ne tudi basànkile Mâyì à mu Lubwebwe awu ditùkù dyônsò, patùdì tudisanga mu Nyumà apa. Dîbà adi, Wêwè udi apa. Tudi Neebè ne dyeyemena, Mukalenge. Tudi ne diitabuuja mu Wêwè. Tudi twitabuuja ne Wêwè neùtùlaabè maanyì, ne neùtùkwàcìshè. Kabiyi bwà butùmbì bwètù twètù to, Mukalenge; tudi bafwànyìne kwikalà bu Môsà dîbà adi, pààkenzàye cintu cibì aci apu. Tudi baswè kwenza cintu kampàndà bwà kuKukwàcisha wêwè, Mukalenge. Awu ki meeji à mu mwoyi wètù, kukukwàcisha Wêwè, bu twètù mwà kucyènza. Tùleejèku, Taatù, cyônsò cyûdì Wêwè muswè bwà twètù kwenza aci's.

<sup>232</sup> Nènku mpindyewu, pa cyenzedi cyà diitabuuja, ndi mpìisha mabèèdì àdì mìshwala eyi yileeja, ne malòmba aa. Neùmukè pa bantu. Ndi mumanyè ne Wêwè ngwacyènza, Mukalenge. Ndi ncìlitabuuja, mu mwoyi wànyì ne, Wêwè ngwacyènza. Ondòpàku bubèèdì bwônsò munkaci mwètù mu dìndà emu.

<sup>233</sup> SÙngilàku aba bëdì byanza muulu, bãmbì ne mbaswè kulwa ku Lubwebwe abu, bwà kupeta Mâyì. Nzambi, swàku bwà bìikalè ne nyòòtà leelù ewu, swàku bwà kwìkalèku nsòmbelu wa mutwè mukelè mu nyùngulukilu wabò, mu mùshindù wà bìbabafisha ku diikala ne nyòòtà yà Kilstò. Enzàku nànkú.

<sup>234</sup> Ikàlìku neetù dilòòlò edi, Taatù. Éyì Nzambi, enzàku ne, ku malòmba aa, njanduléku cídì pa myoyi ya bantu. Kwôkù kakùyi cintu nànscha cimwè pa mwóyi wàbò to, Mukalenga, díbà adi, Ùmpèèshèku cintu kampàndà cyà mêmè kuyiisha myoyi yàbò dilòòlò edi.

<sup>235</sup> Bèneshàku Mwanèètù Neville, ne mukàjèndè, díkù dyèndè; èkèleeziyà wetù mukesè ewu, balubuludi bëètù, balami bëètù, bidimba byètù. Ne Mubidi Wèbè myaba yônsò, ikàlìku neetù, Taatù. Tudi twenda tubànda batàngile ku Siònà, Cimenga cilenga cyà Nzambi.

Mpindyewu tûMwimbilààiyiwù ànu cyanàànà, cyà bushùwà, mu bushùwà menemene mpindyewu. Nwamònú anyì?

Lwâyi, twètù bàdì banangè Mukalenge,  
Ne masànkà ètù àmanyishiibwè,  
Tùdísangààyi mu musambu awu ne cyonà  
cilengèle,  
Tùdísangààyi mu musambu awu ne cyonà  
cilengèle,  
Ne mùshindù awu tunyùngulukila Nkwasa wa  
butùmbi,  
Ne mùshindù awu tunyùngulukila Nkwasa wa  
butùmbi.

Ne myoyi yètù miinyika mpindyewu.

Tudi twenda batàngile ku Siònà,  
Siònà mulenga, mulenga kumònà;  
Tudi twenda tubànda batàngile ku Siònà,  
Cimenga cilenga cyà Nzambi.



*MÂYÎ ÂDI ÂNUKÙ DÎBÀ DYÔNSÒ ÂPÂTUKA MU LUBWEBWE* LUA61-0723M  
(The Ever-Present Water From The Rock)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu mu dìndà, mu matùkù 23 à ngondo wa mwandamutekète, cidimu cyà 1961, mu Branham Tabernacle mu Jeffersonville, Indiana, U.S.A. Ndyumusha pa mukaba wa mèyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyì dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lüntândalà, kulamiibwa mu cikàlwîlà, kukudimunyibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)